

## Htawm tem' ri tuil' ri muk kon' Hkrit Kaw'rinhtu' ok' keuthi

<sup>1</sup> Htawm ti ok' aen' na ko', meuh ui' Paw'lu ku' Peucawo' klawng Eun ui' meuh peue caee Eun Yesu' Hkrit hot' alo Eun Peucawo' na' mae' Sos'htenes' ec'awng' ui' na' ya.

<sup>2</sup> Ya tem' ri tuil' a ri muk kon' Hkrit Eun Peucawo' ut' nang veng Kaw'rinhtu' na' pe'. Pe' pun ri saic' ri seunga' chak' hk'a'naee Yesu' Hkrit Eun mae' pe' pun ri klawng ri meuh peue Eun Peucawo' tiduih' mae' peue klawng muis Eun Yesu' Hkrit Cawo' ut' ku duih' na' ce. Yesu' Hkrit Eun meuh Peucawo' ce mae' Peucawo' e'.

<sup>3</sup> Kah mun' sin' mae' hk'a' kuit nyawk' kuit sam'ran cumyen' lih neum Kuing' Peucawo' e' na' Eun mae' neum Cawo' Yesu' Hkrit Eun na' kue' ri pe' reu'.

### *Mun' keuting ri Peucawo' Eun*

<sup>4</sup> Kopti meuh a mun' sin' Eun Peucawo' tuil' Eun a ri pe' hk'a'naee Yesu' Hkrit Eun na', ui' mun' keuting ri Peucawo' Eun pun pe' laleung. <sup>5</sup> Kopti hk'a'naee Yesu' Hkrit Eun na' pun pe' ri huk'hawn' hk'a'naee ku ceu na'. A meuh hk'a'naee hk'a' leukah' leupong pe' gawm'euc' mae' hk'a' peuyha' cu'yi pe' ku ceu na'. <sup>6</sup> Aen' a meuh kopti leukah' hkam' ui' sa'hki' lawng Eun Hkrit na' pun a ri keutawn' hk'a'naee pe' hawc' na'. <sup>7</sup> Kop awn' na yam buih ko' pe' yam Cawo' e' Yesu' Hkrit kaw Eun tang pucti lih na', pe' hkuin' kaw laee deut ri lapsawng' hk'a' civit na' saec' ti ceu. <sup>8</sup> Punta kaw pe' un' laee kue' vang ri hk'a'naee seunyi Eun Cawo' e' Yesu' Hkrit na', Eun kaw yeuh pe' keutawn' rot hk'a'naee seunyi tisut' na'. <sup>9</sup> Peucawo' kati keutawn'

Eun. Eun klawng pé ing' pawng' ri yeuh a'mawo Eun Kon' ai' ri Cawo' e' Yesu' Hkrit na' Eun.

*Gvah muk gvah cum puri hk'a'naee muk kon' Hkrit*

<sup>10</sup> Ec'awng' na' pé, uí hk'o'hk'ang pé hk'a'naee muis Eun Cawo' e' Yesu' Hkrit na'. Kah pé cawp'maen puri. Pawlaee kah hk'a'naee muk pé na' kue' hk'a' gvah muk gvah cum puri na'. Daecti kah pé meuh hpum' ti meul' kamkuit ti nyeng na' reu'. <sup>11</sup> Ec'awng' uí na' pé, peue nya ka Hkalo'e na' ce ngon' ris ce uí mhawng' hk'a'naee muk pé na' kue' pé hk'a' htu'hting' puri heun' pok. <sup>12</sup> Ku' sum' lah' uí na' ko', ngon' lah' pé, "Hot' uí Paw'lu eun", ngon' pé lah', "Hot' uí Apaw'lu eun", ngon' pé lah', "Hot' uí Petru\* eun", peue seubu ngon' na' pé lah', "Hot' uí Hkrit Eun."

<sup>13</sup> Hkrit pun Eun ri gvah ri meuh heun' peue hawc' aw? Paw'lu pun eun ri tawk' ri yeum pang kleum' rawng'tawp' pun pé aw? Hkam' pé hk'a' cum' na' hk'a'naee muis eun Paw'lu aw? <sup>14</sup> Mun' keuting uí ri Peucawo' Eun kopti a lawn un' meuh yawo tuil' uí hk'a' cum' na' ri Hkris'pas' maeé Gaias' ka ko', uí hkuin' pun ri tuil' hk'a' cum' na' ri pé saec' ti peue. <sup>15</sup> Kop awn' na, a'nhaw' hkuin' kaw cang lah' ri rap ri ti hk'a' cum' na' hk'a'naee muis uí na' saec' ti peue. <sup>16</sup> (Meuh, uí ku tawn tuil' hk'a' cum' na' ri peue nya peue hk'ul' eun Satehpanas' na' ce yeut. Lheu' awn' a ko', uí ci' tawn tuil' hk'a' cum' na' ri a'nhaw' bae na' uí hkuin' laee pawn a.) <sup>17</sup> Kopti Hkrit hpaw Eun ca' cus' uí punta kaw uí tuil' hk'a' cum' na', daecti punta kaw uí sangsawn' leukah' mun' ren'kaw' na'. A hkuin' meuh sangsawn' a hot' hk'a' leukah' teo' nyum ka cu'yi ce peue na' meuh a kopti lhat' ri tí'ca ka kleum' rawng'tawp' Eun Hkrit na' kaw a yawm' lih na'.

---

\* **1:12** 1:12 Nang htawm Seungá na' ngon' a lah' "Kefas".

*Hkrit meuh Eun cu'yi mae' ti'ca Eun Peucawo'*

<sup>18</sup> Peue buih kaw lulaic heul' na' nyu ce lawng ka kleum' rawng'tawp' na' meuh lawng ku' nga'. Daecti pun peue buih kaw lawtpon na' e' nyu a meuh lawng ti'ca Eun Peucawo'. <sup>19</sup> Kopti tem' a ri lah' ri nang htawm Seunga' na',

“Kaw Ui' yeuh cu'yi ce peue kue' cu'yi na' lu.

Ui' kaw yeuh hk'a' heng'laet' ce peue heng'laet' na' rai' heul'.”†

<sup>20</sup> Nang kue' cu'yi na' ce ci' ut' tawngnhaw'? Nang yawng htawm na' ce ci' ut' tawngnhaw'? Nang htu'hting' puri lawng cu'yi peue cu yam maet'maen' na' ce ci' ut' tawngnhaw'? Peucawo' yeuh Eun cu'yi ka bhen' keute' na' nga' heul'. <sup>21</sup> Kopti Peucawo' kue' Eun cu'yi heun' nyawk' na', peue bhen' keute' na' peue hkuin' cang yawng lawng Eun na' ri cu'yi ri na'. Peucawo' nyu Eun a hit' hpum' ri kaw Eun teum'kawm peue yum' na' ce lawtpon ri leukah' mun' nga' ku' sangsawn' e' na'. <sup>22</sup> Peue Yu'da na' hk'o' ce ri nyu het' keuting. Peue Helasa' na' ce hot' ri sok cu'yi na'. <sup>23</sup> Daecti e' sangsawn' leukah' mun' lawng Eun Hkrit Cawo' pun ri tawk' ri yeum pang kleum' rawng'tawp' na' Eun. Lawng aen' a meuh ku' seuduih leuveul' pun peue Yu'da na' ce. A meuh ku' nga' pun peue un' meuh peue ceu Yu'da na' ce. <sup>24</sup> Daecti pun ce peue Peucawo' klawng Eun ri ti gawm' peue Yu'da mae' peue Helasa' na' ce ko', Hkrit Eun meuh ti'ca mae' cu'yi Eun Peucawo' na'. <sup>25</sup> Kopti hk'a' nga' Eun Peucawo' na' kawn' heng'laet' a lheu' hk'ai' cu'yi ce peue na'. Hk'a' kaw' reng kloe Eun Peucawo' na' a kawn' reng keuting lheu' hk'ai' kaw' reng ce peue na'.

<sup>26</sup> Ec'awng' na' pe', yam Peucawo' klawng Eun ri ti pe' na', pe' ci' meuh peue yeuh sa'nhaw' na' kuit ri nawk a reu'. Hk'a'nae' pe' ri, nang heng'laet' hk'eup' htan

† 1:19 1:19 í'saya' 29:14

peuyha' cúyi peue tang' peue ri uin' ná' hpaw pé' cá' to' ri kue' heun' peue, nang kue' tí'ca ná' pé' ku hkuin' kue' heun' peue, saec' meuh nang keut' neum peue htan lhung' ná' pé' ku hkuin' kue' heun' peue yeut. <sup>27</sup> Daecti punta peue heng'laet' ná' kaw ce pun ri kaic ná', Peucawó' Eun leuk ri ti ku' bhen' keute' ná' sawn' ka a meuh ku' nga' ná'. Punta peue kaw'ring keuting ná' kaw ce pun ri kaic ná', Peucawó' Eun leuk ri ti ku' bhen' keute' ná' sawn' ka a meuh ku' kaw'ring kloe ná'. <sup>28</sup> Punta Peucawó' kaw Eun yeuh ku' bhen' keute' ná' sawn' ka a meuh vahtu' hk'il' leumuil ná' lulaic heul' ná', Eun leuk ri ti ku' bhen' keute' ná' sawn' ka a meuh ku' tem nyawk', meuh ku' un' nawpsang ka ná' maeé' meuh ku' un' kue' peuehot' ná'. <sup>29</sup> Aen' meuh a punta a'nhaw' hkuin' kaw laee cang mhawng' ri hk'o'cuin nanggal' Eun Peucawó' ná'. <sup>30</sup> Kopti meuh a Peucawó' Eun, pé' pun ri ut' hk'a'naee Yesu' Hkrit Cawó' meuh cúyi neum Peucawó' Eun pun é' ná' Eun. Aen' a meuh hk'a' leupaws seumeu', hk'a' seunga' chak' maeé' hk'a' htut lawtpon é' ná'. <sup>31</sup> Kop awn' na, seun' ku' tem' a ri nang htawm Seunga' ná', "A'nhaw' lawn sum' mhawng' ri hk'o'cuin ko', mhawng' ri hk'o'cuin hk'a'naee Peucawó' Eun reu'."‡

## 2

<sup>1</sup> Ec'awng' ná' pé', yam ing' uí' ri pé' ná', uí' hkuin' to' ri ing' pao' lawng leukah' sa'hki' Eun Peucawó' ná' ri pé' ri leukah' munngawn ná', a'ko' ri leukah' kue' cúyi keuting ná'. <sup>2</sup> Kopti yam kawn' ut' uí' maeé' pé' ná', tang' uí' hpum' ri a lawn un' meuh yawo lawng Eun Yesu' Hkrit ná' maeé' lawng hkam' Eun ri yeum pang kleum' rawng'tawp' ná' ko', uí' hkuin' yawng ku' seubu ná' saec' ti ceu. <sup>3</sup> Ing' uí' ri pé' maeé' kaw'ring kloe lhat' keuyuing' ruing ri nyawk'.

‡ 1:31 1:31 Yerami' 9:24

<sup>4</sup>Leukah' uí' ná' maeé' leukah' mun' sangsawn' uí' ná' hpaw a ca' meuh leukah' ol' ri ti hpum' pé' ná' ri cu'yi ná', daecti meuh a ku' kaw yeuh tí'ca ka Cit' seungá' chak' ná' pucti lih. <sup>5</sup>Aen' meuh a punta hk'a' yum' pé' ná' kaw a un' cu cu'yi ce peue ná', daecti a kaw cu tí'ca Eun Peucawo' ná'.

*Cu'yi lih neum Cit' seungá'*

<sup>6</sup>Saéc' yeuh sa'nhaw', lah' e' leukah' cu'yi ná' ri peue heng' keuting ná' ce hawc'. A hkuin' meuh cu'yi ce peue cu aen' na, a ku hkuin' meuh cu'yi ce cawo' u'peung cu maet'maen' ku' kaw lulaic heul' ná' ce. <sup>7</sup>Daecti e' lah' lawng cu'yi vangdoh' rui' Eun Peucawo' ná'. A meuh cu'yi ku' Peucawo' hkvét' mó' Eun ri uin' a pun munhpung' e' tang' neum yam bhen' keute' ná' un' nang pun a ri hpanpleng' ri ná'. <sup>8</sup>Cawo' u'peung cu yam maet'maen' ná' ce hkuin' kue' nang leuceng pun cu'yi aen' a saéc' ti peue. Kopti ce lawn ná' leuceng pun a ko', ce hkuin' kaw duing tawk' Cawo' munhpung' keuting ná' Eun pang kleum' rawng'tawp' ná'. <sup>9</sup>Seun' ku' tem' a ri nang htawm Seungá' ná',

“Ku' un' duing nyu ri ngái' ri ná',

ku' un' duing mhawng' ri yhuk' ri ná'  
maeé' ku' un' duing kuit rot ri ka nang hpum' ri ná'  
meuh a ku' Peucawo' rangraen Eun ri uin' pun peue ku' ce  
leumeus' Eun ná' ce.”\*

<sup>10</sup>Daecti Peucawo' Eun tuh' e' nyu ceu nang aen' ce ri Cit' seungá' ri ná'.

Cit' seungá' ná' eo' sok a ri nyu ku ceu ná'. Saéc' meuh ku' vangdoh' rui' Eun Peucawo' ná', a ku sok ri nyu a yeut.

<sup>11</sup>Seun' kamkuit eun peue ná' a'nhaw' hkuin' yawng a, a lawn un' meuh yawo cit' eun ná' meun ko', kamkuit Eun Peucawo' ná' a'nhaw' ku hkuin' yawng a, a lawn un'

---

\* 2:9 2:9 I'saya' 64:4

meuh yawo Cit' seunga' Eun na' meun ko'. <sup>12</sup> Punta kaw e' leuceng pun ku' Peucawo' tuil' Eun ri e' a un' lae kue' vang sut' vang euc' na', hpaw e' ca' pun ri rap ri ti cit' ka bhen' keute' na', daecti pun e' ri rap ri ti Cit' seunga' lih neum Peucawo' Eun na'. <sup>13</sup> Yam lah' e' lawng aen' ce na', e' hkuin' lah' leukah' lih neum cu'yi peue na', daecti lah' e' leukah' ku' Cit' seunga' tuil' ka ri e' na'. Aen' a meuh lah' e' lawng ka Cit' seunga' na' ri peue kue' Cit' seunga' na' ce. <sup>14</sup> Peue un' kue' Cit' seunga' na' ce hkuin' cang rap ri ti ku' lih neum Cit' seunga' Eun Peucawo' na' pun, kopti nyu ce a meuh ku' nga' na'. Ce hkuin' cang leuceng ceu nang aen' ce pun, kopti punta kaw ce cang leuceng ceu nang aen' ce pun na', a kah ri lo' hk'a' hkvet' gvah hk'a' civit na'. <sup>15</sup> Peue ut' hk'a'nae hk'a' civit na' cang caet eun ri nawk ku ceu na' pun, daecti a'nhaw' hkuin' cang caet ri nawk lawng eun na' pun.

<sup>16</sup> "Kopti a'nhaw' ci' yawng hpum' Eun Peucawo' na'?

A'nhaw' ci' kaw cang sangsawn' Peucawo' Eun?"†  
Daecti e' ri, kue' e' hpum' Eun Hkrit na'.

### 3

#### *Gvah muk gvah cum puri hk'a'nae muk kon' Hkrit*

<sup>1</sup> Ec'awng' na' pe', ui' hkuin' kaw cang leukah' mae' pe' seun' leukah' ui' mae' peue ut' hk'a'nae hk'a' civit na' ce, daecti ui' kaw kah ri leukah' mae' pe' seun' leukah' ui' mae' peue ut' hk'a'nae hk'a' nham' keune na' ce mae' seun' meuh pe' o'ngak hk'a'nae Hkrit Eun na'. <sup>2</sup> Uii' ui' pe' ri leuum' pui na'. Ui' hkuin' uii' pe' ri ku' hk'a' cen' na' kopti nanggal' aen' na un' nang hueng' pe' ku' hk'a' cen' na'. Neumneum ka na' ko', pe' ta hkuin' nang hueng' a rot maet'maen'. <sup>3</sup> Kawn' ut' pe' hk'a'nae hk'a' nham'

† 2:16 2:16 I'saya' 40:13

keune na', kopti hk'a'naee muk pe' na' kaw'n' kue' pe' hk'a' hko'e'mang' na' mae'e' hk'a' kleuc'leumeul puri na'. Kopti meuh a awn' a na', pe' kaw'n' ut' hk'a'naee hk'a' nham' keune na', un' meuh ka aw? Pe' kaw'n' yeuh seun' peue sum'hpap na' ce, un' meuh ka aw? <sup>4</sup>Kopti pe' ri ti ri peue yam lah' eun, "Meuh ui' ta'pae' eun Paw'lu", ngon' ti ri peue eun lah', "Meuh ui' tapae' eun Apaw'lu", kaw'n' meuh pe' peue sum'hpap yawo, un' meuh ka aw?

<sup>5</sup> Apaw'lu eun ci' meuh a'nhaw'? Paw'lu eun ci' meuh a'nhaw'? Gum meuh ya mhai' va pe' ing' yum' hot' beus ku' Peucawo' sawng' tuil' Eun ri ya na'. <sup>6</sup> Meuh ui' nang jheum' a, Apaw'lu eun meuh nang lhuik' a. Daecti Peucawo' Eun meuh nang yeuh a keuting. <sup>7</sup> Kop awn' na, nang jheum' na' eun a'ko' nang lhuik' na' eun ka hkuin' a'ye' keuting. Daecti Peucawo' Cawo' yeuh a keuting na' a'ye' keuting Eun. <sup>8</sup> Nang jheum' na' eun mae'e' nang lhuik' na' eun vang keutui' hpum' ka na' meuh a keuhti. Ka kaw pun lapsawng' na' hot' seun' kan' ku' sawng' yeuh ka na'. <sup>9</sup> Kopti meuh ya nang yeuh kan' Eun Peucawo' na' tiduih'. Pe' ri, pe' meuh mal' Eun Peucawo' mae'e' pe' meuh nya Eun Peucawo' na'.

<sup>10</sup> Kopti meuh a mun' Peucawo' tuil' Eun ri ui' na', ui' pun ri tang' kleum' ka nya na' hawc' seun' a meuh ui' nang chanan pleng' nya ko'. Peue seubu na' ce ing' go' hk'a'pang ka kleum' awn' na huk'. Daecti a kaw go' ri yeuh sa'nhaw' na' sawng' uin' sati ri reu'. <sup>11</sup> Kopti a lawn un' meuh yawo kleum' tang' ri uin' ri hawc' awn' na ko', a'nhaw' hkuin' kaw cang ing' tang' a is' kleum' seubu na' bae. Kleum' tang' ri uin' ri awn' a meuh Yesu' Hkrit Eun. <sup>12</sup> A'nhaw' lawn go' kleum' awn' a huk' ri hk'il', leumuil, seumu seng', hku', plawng', a'ko' peung, <sup>13</sup> kan' ku' yeuh eun na' a kaw pucti lih glih'gleueng'. Kopti hk'a'naee seunyi awn' na, kan' ku' yeuh eun na' a kaw tuh' ri glih'gleueng' ri ngawl na'. Ngawl na' a kaw caet ri nawk kan' ku' yeuh peue na' ti

peue hawc' ti peue. <sup>14</sup> Ku' go' eun huk' na' a lawn keutawn' ko', eun kaw pun lapsawng' ri na' meun. <sup>15</sup> Ku' go' eun na' a lawn ha' hk'ue euc' ko', eun kaw sum lapsawng' ri na', daecti tu' eun na' a kaw lawtpon. Daecti a kaw seun' lawtpon hk'ai' ngawl na' ko'.

<sup>16</sup> Un' yawng pe' a aw? Meuh pe' nya hk'o' mun' Eun Peucawo', Cit' seunga' Eun Peucawo' na' a ut' hk'a'naee pe'.

<sup>17</sup> A'nhaw' lawn yeuh nya hk'o' mun' Eun Peucawo' na' lu ko', Peucawo' Eun kaw yeuh hkawn' eun lu. Kopti nya hk'o' mun' Eun Peucawo' na' seunga' chak' ka. Pe' ri, pe' meuh nya hk'o' mun' awn' a.

<sup>18</sup> Pawlaee chi'lai tu' ri na' meun. Hk'a'naee pe' ri ti ri peue, a'nhaw' lawn mhawng' ri heng'laet' hot' htan cu maet'maen' na' ko', punta kaw eun meuh peue heng'laet' na', kaw eun kah ri meuh "peue nga'". <sup>19</sup> Kopti cu'yi ka bhen' keute' aen' meuh a ku' nga' ri sai' ngai' Eun Peucawo', hot' seun' ku' tem' a ri hk'a'naee htawm Seunga' na' ko', "Peucawo' mheut' Eun ri ti peue heng'laet' na' ce ri hk'a' vok' ce na' meun."\* <sup>20</sup> Hk'a'naee htawm Seunga' ton seubu na' a ku' tem' ri, "Peucawo' yawng Eun kamkuit ce peue heng'laet' na' meuh a ku' hk'o' hk'awng'."† <sup>21</sup> Kop awn' na, pawlaee mhawng' ri hk'o'cuin ri yuk peue lhung' na' bae. Ku' ceu gawm'euc' na' meuh a is' pe'. <sup>22</sup> Paw'lu eun, a'ko' Apaw'lu eun, a'ko' Petru' eun, a'ko' bhen' keute' na', a'ko' a'yu na', a'ko' hk'a' yeum na', a'ko' cu yam maet'maen' na', a'ko' hk'a' nanggal' na', a'ko' aen' ce gawm'euc' meuh a is' pe'. <sup>23</sup> Pe' meuh is' Eun Hkrit, Hkrit Eun meuh is' Eun Peucawo'.

## 4

### *Peue caee Eun Hkrit*

\* 3:19 3:19 Yaw'ba' 5:13 † 3:20 3:20 Suk'seun' 94:11



<sup>1</sup> Kop awn' na, peue na' htuk' ri sawn' e' meuh mhai' Eun Hkrit. Peue na' htuk' ri sawn' e' meuh nang roksa' ku' rui' Eun Peucawo' na'. <sup>2</sup> Peue roksa' na' kah eun ri yeuh meuh ri peue kati keutawn' na' pucti lih. <sup>3</sup> Pe' ri, a'ko' a sum' na' meuh a'nhaw', pe' lawn taws' a'mu ri ui' ko', ui' hkuin' seue' a nang hpum' ri. Neumneum ka na' ko', saec' meuh tu' ui' na' meun, ui' hkuin' taws' a'mu ri ti. <sup>4</sup> Hpum' cang yawng ui' na' hpaw a ca' tang' ui' yeuh ku' kleuc'. Daecti ceu nang aen' ce a hkuin' to' ri lah' ui' cawp'. Cawo' Peucawo' kaw Eun meuh nang taws' a'mu ui'. <sup>5</sup> Kop awn' na pawlaee nang kuit a deut nanggal' yam ka na' un' nang rot ka na', ko' a rot ri yam Peucawo' kaw Eun lih rot na' reu'. Peucawo' kaw Eun hue' ku' mo' ri vang duim'lawng na' lih vang ceng' na'. Eun kaw tuh' kamkuit ut' nang hpum' peue na' pucti lih. Yam awn' na, peue kaw pun ri rap ri ti hk'a' Peucawo' suk'seun' Eun ri na' kuing'hpaw mae' ku' yeuh ri na' ku' peue ri.

<sup>6</sup> Ec'awng' na' pe', lah' ui' pe' mhawng' lawng ui' na' mae' lawng eun Apaw'lu na' meuh a punta kaw a kue' peuehot' pun pe'. Aen' a meuh punta kaw pe' rin ri ti vangdoh' ka ku' lah' ka nang htawm Seunga' na' ri ya. A lah', "Pawlaee yeuh a pon lheu' ku' tem' a ri uin' ri na'." Yeuh a keutit' na' ko', pe' hkuin' kaw laee tang' ti peue eun lhung' tang' ti peue eun tem. <sup>7</sup> Kopti a'nhaw' ci' pleng' pe' chat peue ri? Ku' kue' pe' na' pun pe' a neum Peucawo' Eun. Ku' kue' pe' na' a lawn meuh ku' pun pe' neum Peucawo' Eun ko', a ci' yeuh keunhaw' pe' vae' mhawng' ri hk'o'cuin' seun' un' pun pe' a neum Peucawo' Eun ko'?

<sup>8</sup> Pe' caee' koe kue' ku' lo' ri na' ku' ceu ka euc' hawc' aw'? Pe' caee' koe meuneum hawc' aw'? Ya saec' un' pa' pe', pe' ku' caee' koe meuh cawo' hawc' aw'? Punta kaw ya meuh cawo' tiduih' mae' pe' na', ui' ca' lak' sum' kah pe' meuh cawo' neumneum. <sup>9</sup> Kopti nyu ui' Peucawo' Eun uin' peue

caee Eun Hkrit na' ya vang tisu' ka na' seun' peue kaw pun ri yeum eun hawc' taws' a'mu ri na' eun ko'. Ya meuh ku' hk'o'sum' keunyas ri sa'hpakta' ku ceu na', ri in'hpom na' ce mae' ri peue na' ce. <sup>10</sup> Ya meuh peue nga' pun Hkrit Eun, daecti pe' meuh peue heng'laet' hk'a'naee Hkrit Eun. Ya kaw'ring kloe, pe' kaw'ring keuting. Pe' kue' munhpung', ya un' kue' munhpung'. <sup>11</sup> Rot maet' maen', ya ngeup' ku' hk'a, sum' nyui leuum', cut hk'ohk'eung, pun ri hkam' hk'a' ta'faet' na' mae' un' kue' vang ut'. <sup>12</sup> Ya yeuh kan' seucen ri ti' ri na' meun. Yam pun ya ri hkam' hk'a' jha' na', ya nap mun'. Yam pun ya ri hkam' hk'a' keunhap' nokneh na', ya yeun' hkam a. <sup>13</sup> Yam pun ya ri hkam' tang' peue ku' kleuc' ri ti na', ya lah' ris ce mhawng' a hk'a'naee hpum' onawn' ri. Rot maet' maen', ya seun' ku' hk'aw'jeuk ka bhen' keute' na'. Ya meuh hpam' ka lok na'.

<sup>14</sup> A hkuin' caee meuh sum' kah ui' pe' kaic, ui' tem' a yeuhki'. Daecti punta kaw ui' tuil' sati pe' seun' meuh pe' kon' leumeus' ui' na'. <sup>15</sup> Pe' saec' na' kue' nang sangsawn' lawng Eun Hkrit na' ri pe' hk'o' timhuin' peue ko', daecti kue' pe' kuiing' ti peue. Kopti hk'a'naee Yesu' Hkrit Eun, pun ui' ri meuh kuiing' pe' ri leukah' mun' ren'kawn na'. <sup>16</sup> Kop awn' na, ui' hk'o' pe' hot' ri yeuh seun' ku' yeuh ui' na'. <sup>17</sup> Meuh a kopti awn' na, ui' cus' Ti'mo'se kon' leumeus' ui' ku' kati keutawn' hk'a'naee Peucawo' Eun na' eun heul' ri pe'. Aen' a meuh punta kaw eun tuil' sati pe' ri kaw pe' kuit rot ri hk'a' a'yu im' ui' hk'a'naee Yesu' Hkrit Eun na'. A'yu im' ui' hot' seun' ku' sangsawn' ui' ri muk kon' Hkrit ku duih' na' ce.

<sup>18</sup> Peue hk'a'naee pe' na' ce ngon', ce mhawng' ri hk'o'cuin seun' kaw ui' un' laee ing' ri pe' ko'. <sup>19</sup> Daecti a lawn cawp' alo Eun Peucawo' ko', un' ling' na' ui' tang ing' ri pe'. Yam awn' na, a hkuin' kaw meuh kaw ui' pun ri yawng ku' lah' ce peue hpum' keuting awn' na palkoe,

daecti uí' ku kaw pun ri yawng tí'ca kue' ce ná' yeut.  
<sup>20</sup>Kopti kuing' Eun Peucawó' ná' un' meuh a lawng leukah',  
 daecti a meuh lawng tí'ca. <sup>21</sup>Pe' cí' nyu keunhaw' a htuk'  
 hpum' ri. Sum' kah pe' uí' ti hku' ta'veut ing' aw, a'ko' ing'  
 mae' hk'a' leumeus'keus mae' hpum' onawn' ri aw?

## 5

### *Ra ri tec peue hkuít' nawng'tang'*

<sup>1</sup>Pun uí' ri mhawng' lawng peue hk'a'naee pe' ná' yeuh  
 eun ku' kleuc' hkuít' nawng'tang' ku' peue un' yum' ná' ce  
 ku hkuín' duing yeuh a ná'. Peue tit' eun ti beun' eun  
 kuiing' ri ná' eun meuh beun' ri. <sup>2</sup>A saee' meuh htan' aen'  
 na, pe' vaeé' kawn' meung mhawng' ri hk'o'cuin. Htuk'  
 pe' ri hpum' lu un' mak' laee yeuh a'mawo eun peue yeuh  
 keutit' ná' eun, un' meuh ka aw? <sup>3</sup>Tu' uí' ná' a saec' un' ut'  
 maeé' pe', daecti hpum' uí' ná' ut' a maeé' pe' yeut. Pun uí'  
 ri taws' a'mu ri peue yeuh keutit' ná' eun seun' ut' uí' maeé'  
 pe' ko'. <sup>4</sup>Yam hk'om pe' puri hk'a'naee muis Eun Cawó' é'  
 Yesú' ná', hpum' uí' ná' maeé' tí'ca Eun Cawó' é' Yesú' ná'  
 a ku ut' maeé' pe' yeut. <sup>5</sup>Punta civit eun peue awn' kaw  
 a pun hk'a' htut lawtpon ná' hk'a'naee seunyi Eun Cawó'  
 é' Yesú' ná', ap Satan ná' yeuh hk'a' nham' keune eun ná'  
 lulaic reu'.

<sup>6</sup>Mhawng' pe' ri hk'o'cuin ná' a hkuín' chak'. Yeuh  
 map' yeuhki' ná' seun' a paeng ná' ko'. Paeng kue' peunaé'  
 jhaec' ná' cang yeuh a hkawomun' ná' bing' gawm' meul'  
 ri. <sup>7</sup>Punta kaw pe' pun ri meuh hkawomun' hk'u' un'  
 kue' paeng seun' ku' buih meuh pe' ná', saic' ri tec paeng  
 hk'im' ná' reu'. Kopti Hkrit Cawó' meuh kon'jung' aet' ka  
 pawe vel nya é' ná' pun Eun ri hkam' ri tan ri hawc' ná'.  
<sup>8</sup>Kop awn' na, pawlaee kah é' jhawp' pawe aen' na ri paeng  
 hk'im' ku' meuh paeng ka ku' rai ku' hk'aw'jeuk ná', daecti  
 kah é' jhawp' a ri hkawomun' un' kue' paeng ku' meuh

hkawomun' ka hk'a' seunga' chak' maeé' hk'a' neumneum na' reu'.

<sup>9</sup> Uí' tem' htawm ri pe' un' kah pe' yeuh a'mawo ce peue hkuit'nawng'tang' na' ce. <sup>10</sup> Daecti hpaw uí' ca' lah' peue bhen' keute' hkuit'nawng'tang' na' ce, a'ko' peue law' hpa keuting chi' lai ri hk'a, a'ko' peue faeé' ruphtu na' ce. Yeuh keutit' na' ko', pe' ku kaw pun ri pucti heul' hk'ai' bhen' keute' aen' na yeut. <sup>11</sup> Daecti ku' tem' uí' ri pe' maet' maen' na' punta kaw uí' lah' a ri pe' un' kah pe' yeuh a'mawo ce peue lah' meun ri meuh ec'awng' daecti ce kaw'n' yeuh hk'a' hkuit'nawng'tang' na', a'ko' kaw'n' law' hpa keuting, kaw'n' faeé' ruphtu na', a'ko' kaw'n' ren' maeé' saesawm' peue na', yuic' ri plai', a'ko' chi' lai ri hk'a peue na'. Peue yeuh keutit' na' ce ko', saec' meuh som' yawo maeé' ce na', pawlae som'.

<sup>12</sup> Kan' taws' a'mu ri peue ut' hk'a' nok ce muk kon' Hkrit na' ce, hpaw a ca' meuh kan' uí'. Kaw pe' pun ri taws' a'mu ri peue ut' hk'a' naee muk pe' na' ce, un' meuh ka aw? <sup>13</sup> Peucawo' kaw Eun taws' a'mu ri peue ut' hk'a' nok ce muk kon' Hkrit na' ce. Nang htawm Seunga' na' a lah', "Ra ri tec peue rai na' ce pucti heul' hk'ai' muk pe' na' reu'."\*

## 6

### *A'mu hk'a' naee muk ce peue yum' na'*

<sup>1</sup> Hk'a' naee muk pe' na' ngon' pe' lawn yeuh a'mu ri puri ko', ha' pe' ri yeuh a nanggal' ce peue un' leupaws seumeu' na', pe' un' yeuh a nanggal' ce peue Eun Peucawo' na' aw?

<sup>2</sup> Un' yawng pe' peue Eun Peucawo' na' kaw ce taws' a'mu ri peue bhen' keute' na' ce aw? Pe' lawn na' meuh nang taws' a'mu ri peue bhen' keute' na' ce ko', kaw pe' un' cang taws' a'mu aet' aet' aen' ce aw? <sup>3</sup> Un' yawng pe' kaw e' taws' a'mu

\* [5:13](#) [5:13](#) [Sawn' leukah' mun' 17:7; 19:19; 21:21; 22:21, 24; 24:7](#)

ce in'hpom na' aw? Yeuh keutit' ko', e' jaen kaw cang taws' a'mu ri lawng ka a'yu aen' na. <sup>4</sup>Kop awn' na, pe' lawn yeuh a'mu ri puri lawng aen' na ko', kaw pe' tang' peue muk kon' Hkrit sawn' pe' eun meuh nang un' kue' munhpung' na' eun meuh nang taws' a'mu ri pe' aw? <sup>5</sup>Lah' ui' a yeuh keutit' na' meuh a punta kaw pe' kaic ri ti meun. Hk'a'nae pe' ri, un' kue' pe' nang kue' cu'yi kaw cang taws' a'mu ri ec'awng' ku' yeuh a'mu ri puri na' ka aw? <sup>6</sup>Daecti ec'awng' na' heul' taws' ka a'mu ri na' nanggal' ce peue un' yum' na' ce aw?

<sup>7</sup>Neumneum ka na' ko', yeuh pe' a'mu ri puri hk'a'nae muk pe' na' vangdoh' ka na' meuh pe' nang sum hawc'. A ci' meuh kop keunhaw' pe' vae' un' yawm' ri hkam' hk'a' hkvi peue ri na'? A ci' meuh kop keunhaw' pe' vae' un' yawm' ri hkam' hk'a' chi'lai peue ri hk'a ri na'? <sup>8</sup>Daecti meuh pe' nang chi'lai ri hk'a peue meun, meuh nang hkvi peue meun. Pe' yeuh ceu nang aen' ce ri ec'awng' ri na' ce.

<sup>9</sup>Un' yawng' pe' peue rai na' kaw ce un' pun ri lec hk'a'nae kuing' Eun Peucawo' na' aw? Pawlaee va ri kleuc' hk'a' ri. Peue hkuin' nawng'tang', a'ko' peue fae' ruphtu, a'ko' peue len'cu, a'ko' me paing' ri, a'ko' me it' mae' me beun' it' mae' beun', <sup>10</sup>a'ko' peue ra, a'ko' peue law' hpa keuting, a'ko' peue yuic' ri plai', a'ko' peue saesawm' peue, a'ko' peue chi'lai ri hk'a peue na' kaw ce un' pun ri lec hk'a'nae kuing' Eun Peucawo' na'. <sup>11</sup>Pe' ri ngon', pe ku tawn meuh peue yeuh keutit' yeut. Daecti pun pe' ri saic', pun pe' ri yeuh ri seungá hawc'. Pe' pun ri sawn' ri meuh peue leupaws seumeu' hk'a'nae muis Eun Cawo' Yesu' Hkrit mae' hk'a'nae Cit' seungá Eun Peucawo' e' na' Eun hawc'.

*Tuil' munhpung' Eun Peucawo' na' ri tu' pe' na'*

<sup>12</sup>Pun ui' ahkvang kaw yeuh ku ceu na' pun, daecti ku ceu na' ce a hkuin' pe kue' mun' gawm'euc'. Pun ui'

ahkvang kaw yeuh ku ceu na' pun, daecti ui' hkuin' yawm' ri meuh mhai' ka saec' ti ceu. <sup>13</sup> Ku' hk'a na' meuh a pun ka keuteul na', keuteul na' a meuh pun ka ku' hk'a na', daecti Peucawo' Eun kaw yeuh a lulaic heul' gawm' lal' ceu ka. Jawngkui' tu' na' a hkuin' meuh pun ka hk'a' hkuit'nawng'tang' na', daecti meuh a pun Eun Cawo' Yesu'. Cawo' Yesu' Eun ku meuh pun jawngkui' tu' na'. <sup>14</sup> Seun' Peucawo' yeuh Eun Yesu' Eun tang kuh' im' na', Eun ku kaw yeuh e' tang kuh' im' ri ti'ca ri na' yeut. <sup>15</sup> Un' yawng pe' tu' ri na' meuh a hk'eung ka tu' Eun Hkrit na' aw? Yeuh keutit' ko', ui' kaw htuk' ri ti hk'eung Eun Hkrit na' heul' pawng' a meuh yawo keuhti mae' beun' paing' ri na' ce aw? Un' htuk' ri meuh. <sup>16</sup> Un' yawng pe' peue it' mae' beun' paing' tu' ri na' meuh eun jawngkui' tu' keuhti yawo mae' beun' awn' eun aw? Kopti nang htawm Seunga' na' tem' a ri, "Kaw ka meuh yawo jawngkui' tu' keuhti."\* <sup>17</sup> Daecti peue pawng' tu' meun ri na' meuh keuhti mae' Cawo' Yesu' Eun na' meuh ce cit' keuhti yawo mae' Yesu' Eun.

<sup>18</sup> Vel hk'a' hkuit'nawng'tang' na' reu'. Map' seubu yeuh peue gawm'euc' na' meuh a map' hk'a'nok ka jawngkui' tu' na'. Daecti peue yeuh map' ka hk'a' hkuit'nawng'tang' na' a meuh yeuh eun map' ri jawngkui' tu' ri na' meun. <sup>19</sup> Un' yawng pe' jawngkui' tu' pe' na' meuh a nya hk'o' mun' ka Cit' seunga' chak' ku' ut' hk'a'naee pe' ku' pun pe' ri rap ri ti neum Peucawo' Eun na' aw? Hpaw pe' ca' meuh cawo' ka jawngkui' tu' ri na' meun. <sup>20</sup> Peucawo' leuvae Eun ri ti pe' ri ngos heun' nyawk' na' hawc'. Kop awn' na, tuil' munhpung' ri Peucawo' Eun ri jawngkui' tu' pe' na' reu'.

## 7

### *Ti beun' ti me*

---

\* 6:16 6:16 Yamla 2:24

<sup>1</sup> Sum' tem' uí' ri top' lai tuil' pe' ri uí' na' yeuhki', me na' eun lawn na' un' klawo' beun' ko', na' a chak'. <sup>2</sup> Daecti kopti lheu' a ri hk'a' hkuit' nawng'tang' na', me na' ce htuk' ri sawng' ti ri is' beun' ku peue ri. Beun' na' ce ku htuk' ri sawng' ti ri is' me ku peue ri. <sup>3</sup> Me na' eun htuk' ri yeuh ku' htuk' eun ri yeuh ri beun' ri na' eun htonnuk. Seun' awn' na, beun' na' eun ku na' htuk' ri yeuh ku' htuk' eun ri yeuh ri me ri na' eun htonnuk yeut. <sup>4</sup> Jawngkui' tu' eun beun' na' a hkuin' meuh is' heun palkoe, daecti a ku meuh is' eun me eun na' yeut. Seun' awn' na, jawngkui' tu' eun me na' a ku hkuin' meuh is' heun palkoe, daecti a ku meuh is' eun beun' eun na' yeut. <sup>5</sup> A lawn un' meuh yawo hk'o' mun' kam' jawngkui' tu' ri sahpaw' ri un' it' tiduih' ti vut ti yam na' ko', pawlae ham' hk'a' it' tiduih' na. Punta Satan na' kaw a un' cang cop'long ri pun pe' yeuh ku' kleuc' na' kopti un' pe pe' tu' ri na', hawc' kam' pe' jawngkui' tu' ri na', tang it' tiduih' reu'. <sup>6</sup> Lah' uí' a yeuhki' na', meuh a tuil' uí' ahkvang ka, a hkuin' meuh tuil' uí' leukah'. <sup>7</sup> Sum' kah uí' peue seun' uí' ri gawm'euc', daecti lapsawng' pun e' ri Peucawo' Eun na' ti peue hawc' ti peue un' seun' a puri. Ti peue eun pun lapsawng' aen' na, ku' seubu ti peue na' eun pun lapsawng' teh' a.

<sup>8</sup> Pun nang un' nang ti ri is' beun' is' me na' mae' peue seunao na' pe', lah' uí' pe' na' un' ti ri is' beun' seun' uí' ri a na' chak'. <sup>9</sup> Daecti pe' lawn un' cang pe tu' ri na' meun ko', pe' na' htuk' ri ti ri is' beun' is' me, kopti ti ri is' beun' is' me na' a jaen na' chak' hk'ai' hpum' ha' ron pe' ri kopti hkuit' nawng'tang' pe' na'.

<sup>10</sup> Pun peue ti ri is' beun' is' me na' pe', tuil' uí' leukah' ri pe' (a hkuin' meuh leukah' tuil' uí', a meuh leukah' tuil' Eun Peucawo'), beun' na' pawlae hk'acak' me ri. <sup>11</sup> Daecti eun lawn hk'acak' me ri na' eun ko', eun hkuin' kaw kah ri ti ri is' me hk'u'. Un' meuh ko', eun kaw kah ri

ti me hk'im' ri na' eun. Saec' meuh me na', eun ku hkuin' kaw kah ri tec beun' ri na' eun.

<sup>12</sup> Uí lah' a ri peue seubu na' ce (a hkuin' meuh leukah' Eun Peucawo'), ec'awng' ti ri peue beun' eun na' eun lawn un' meuh kon' Hkrit daecti eun kue' hpum' sum' ut' maeé' me ri na' eun ko', me na' eun hkuin' kaw kah ri tec beun' awn' eun. <sup>13</sup> Saec' meuh beun' na' me eun na' eun lawn un' meuh kon' Hkrit daecti eun kue' hpum' sum' ut' maeé' beun' ri na' eun ko', beun' na' eun hkuin' kaw kah ri tec me awn' eun. <sup>14</sup> Kopti me un' meuh kon' Hkrit na' pun eun ri saic' ri seunga' chak' ri beun' ri na' eun hawc' na'. Beun' un' meuh kon' Hkrit na' eun ku pun ri saic' ri seunga' chak' ri me meuh kon' Hkrit na' eun hawc'. A lawn un' yeuh keutit' ko', kon' ka na' ce kaw meuh peue hk'aw'jeuk. Daecti kon' aen' seunga' chak' ce hawc'.

<sup>15</sup> Daecti peue un' meuh kon' Hkrit na' eun lawn hk'akcak' heul' ko', tae' eun reu'. Aen' a ko', beun' meuh kon' Hkrit a'ko' me meuh kon' Hkrit na' eun hkuin' kaw lae pun ri hkam' ri mawt ri maeé' peue un' meuh kon' Hkrit na' eun bae. Peucawo' klawng Eun e' ut' hk'a'nae hk'a' cumyen' na'. <sup>16</sup> Beun' na' pe', un' yawng pe' kaw ri cang teum'kawm me ri na' ce pun hk'a' htut lawtpon na' aw? Me na' pe', un' yawng pe' kaw ri cang teum'kawm beun' ri na' ce pun hk'a' htut lawtpon na' aw?

<sup>17</sup> Saec' yeuh sa'nhaw', pe' ri ti peue hawc' ti peue a'yu im' hot' seun' ku' tawn meuh pe' na' maeé' seun' ku' Peucawo' sum' kah Eun pe' meuh yam klawng Eun ri ti pe' na' reu'. Aen' meuh a ritroe tang' uí ri uin' a ri muk kon' Hkrit gawm'euc' na' ce. <sup>18</sup> Me ti ri peue na' eun lawn pun hk'a' Peucawo' klawng Eun ri ti ri yam hawc' eun ton' duing' hak' ri na' ko', htuk' eun ri un' yeuh roe ka ton' duing' hak' na' rai'. Me ti ri peue na' eun lawn pun hk'a' Peucawo' klawng Eun ri ti ri yam un' nang ton' eun duing' hak' ri na' ko', htuk' eun ri un' ton' duing' hak' ri



na'. <sup>19</sup> Kopti a'ye' keuting ka na' hpaw a ca' ut' ri ton' duing' hak' ri, a'ko' un' ton' duing' hak' ri na'. Daecti ut' a ri rok'sa' e' leukah' tuil' Eun Peucawo' na'. <sup>20</sup> Pe' ri ti peue hawc' ti peue cu ri meuh seun' ku' meuh pe' yam Peucawo' klawng Eun ri ti pe' na' reu'. <sup>21</sup> Yam Peucawo' klawng Eun ri ti pe' na' meuh pe' mhai' aw? Hpaw a ca' yeuh keunhaw'. Daecti pe' lawn kaw cang yeuh meun ri meuh peue pon ko', yeuh a reu'. <sup>22</sup> Kopti ku' Peucawo' klawng Eun ri ti eun yam kaw'n' buih meuh eun mhai' na', meuh eun peue pon Eun Peucawo'. Seun' awn' na, peue meuh peue pon yam Peucawo' klawng Eun ri ti ri na' meuh eun mhai' Eun Hkrit. <sup>23</sup> Hkrit leuvae eun ri ti mi ri ngos heun' nyawk' na'. Pawlaee meuh mhai' ce peue na' bae. <sup>24</sup> Ec'awng' na' pe', yam Peucawo' klawng eun ri ti pe' na' pe' lawn meuh yeuh sa'nhaw' ko', cu ri meuh yeuhko' reu'.

*Peue un' nang ti ri is' beun' is' me*

<sup>25</sup> Pun ce peue un' nang sang' nya ri na', hpaw ui' ca' pun leukah' neum Peucawo' Eun. Daecti kaw ui' tuil' kamkuit pe' ri hk'a'naee meuh ui' peue pun ri rap ri ti hk'a' tuckyak Eun Peucawo' na' Eun tuil' ui' meuh peue hk'o'yum'. <sup>26</sup> Kopti meuh a hk'a' tukhka buih meuh maet'maen' na', ui' kuit pe' na' htuk' ri meuh seun' ku' buih meuh pe' maet'maen' na', a na' chak'. <sup>27</sup> Kue' mi beun' hawc' aw? Pawlaee sok hk'a' kaw ri tec beun' ri na' eun. Un' nang ti mi ri is' beun' aw? Pawlaee sok ri is' beun'. <sup>28</sup> Daecti ti mi ri is' beun' na', a hkuin' to' meuh map'. Beun' un' nang sang' nya ri na' ce saec' na' ti ri is' me ko', a ku hkuin' to' meuh map'. Daecti peue ti ri is' beun' is' me na' kaw ce lheu' ri ku' kuit nyhap' heun' ceu hk'a'naee vang a'yu im' ce na'. Ui' sum' kah pe' lawtpon hk'ai' ceu nang aen' ce.

<sup>29</sup> Ec'awng' na' pe', vangdoh' ka ku' sum' lah' ui' na' meuh a yam na' dot' ka hawc'. Tang' neum maet'maen'

na', peue kue' beun' na' htuk' ce ri a'yu im' seun' meuh ri nang un' kue' beun' ko'. <sup>30</sup> Peue mhong'mhil' na' yeuh ri a'yu im' seun' un' mhong'mhil' ri ko'. Peue ren'kawn na' yeuh ri a'yu im' seun' un' ren'kawn ri ko'. Peue leuvaee na' yeuh ri a'yu im' seun' un' meuh ri cawo' ko'. <sup>31</sup> Peue lo' hk'eung ka bhen' keute' na' yeuh ri a'yu im' seun' un' pun ri ri lo' a htonnuk ko'. Kopti ku' buih meuh ka bhen' keute' na' buih pon ka heul'.

<sup>32</sup> Sum' kah ui' pe' lawtpon hk'ai' ku' kuit nyhap' kuit yak na'. Peue un' ti ri is' beun' na' katcin ce ri kan' Eun Peucawo' na'. Ce htalikawm' hkam' ri yeuh ku' kaw htuk' hpum' Eun Peucawo' na'. <sup>33</sup> Daecti peue ti ri is' beun' hawc' na' katcin ce ri kan' ka bhen' keute' na'. Ce htalikawm' hkam' ri yeuh ku' kaw htuk' hpum' ce beun' ri na'. <sup>34</sup> Ku' peus ce hpum' ri ri ka na' a gvah ri meuh lal' hk'a'. Beun' un' nang ti ri is' me na' katcin ce ri kan' Eun Peucawo' na'. Ce htalikawm' hkam' ri tan tu' meun ri na' ri Peucawo' Eun gawm' jawngku' tu' mae' civit ri na'. Daecti peue ti ri is' me hawc' na' katcin ce ri kan' ka bhen' keute' na'. Ce htalikawm' hkam' ri yeuh ku' kaw htuk' hpum' ce me ri na'. <sup>35</sup> Lah' ui' a yeuhki' na' meuh a pun ku' peuehot' pun pe'. A hkuin' to' ri meuh taws' ui' a ri pe'. Daecti meuh a punta kaw pe' cang a'yu im' hk'a'naee hk'a' cawp' na' ri sawng' tan pe' tu' meun ri na' ri Peucawo' Eun na' ri un' gvah pe' hpum' ri na' meuh lal' hk'a' na'.

<sup>36</sup> Me ti ri peue eun lawn kue' kon'hk'ih' yeuh kati ri kaw ti eun daecti eun lawn lhat' na' ri cang yeuh ku' un' htuk' ri yeuh ri kon'hk'ih' ri na' eun mae' eun hpum' ha' ron ri hk'a' leumeus'keus ri na' mae' na' ri cang yeuh ku' ti ri ceu ko', kah eun ti kon'hk'ih' awn' eun. Kah eun yeuh ku' sum' yeuh ri na' reu'. Aen' a hkuin' kue' map'. <sup>37</sup> Daecti eun lawn tang' hpum' ri keutawn' kaw un' lo' ri yeuh ku' ti ri ceu, cang eut' hpum' ri pun mae' eun tang' hpum' ri

kaw tae' kon'hk'ih' awn' eun suip ri meuh ku' tang' ri kati ri heun heul' ko', yeuh eun ku' cawp' na' hawc'. <sup>38</sup> Kop awn' na, me ti kon'hk'ih' tang' eun kati ri kaw ti eun na' yeuh eun ku' cawp' na'. Daecti eun lawn un' ti ri is' ko', a jaen na' chak'.

<sup>39</sup> Cu yam me na' kawn' a'yu im' eun na', beun' eun na' eun kaw kah ri ut' mae' heun. Daecti me na' eun lawn yeum heul' ko', beun' awn' eun sum' ti a'nhaw' eun kaw cang ti a hot' seun' alo ka hpum' ri na' yeut. Daecti me awn' eun kaw kah ri meuh peue yum' Peucawo' Eun. <sup>40</sup> Seun' ku' kuit ui' na' ko', beun' awn' eun lawn ut' koe meun ko', eun jaen kaw ren'kawn. Lah' ui' ceu nang aen' ce na' kuit ui' Cit' seung' Eun Peucawo' na' a ku ut' mae' ui'.

## 8

### *Ku' hk'a tan ri ruphtu*

<sup>1</sup> Lawng ka ku' hk'a tan ri ruphtu na' yeuh a ki'. Yawng e' kue' ri cu'yi gawm'euc' ri. Cu'yi na' yeuh ka e' hpum' lung' hpum' keuting. Daecti hk'a' leumeus'keus na' a yeuh e' teum'kawm puri. <sup>2</sup> Peue ti ri peue eun lawn hteum' ri yawng ku' ti ri ceu na' hawc' ko', hpaw eun ca nang yawng ku' kuing'hpaw eun ri yawng na'. <sup>3</sup> Daecti peue leumeus' Peucawo' Eun na' eun ko', Peucawo' Eun ku yawng hkawn' eun yeut.

<sup>4</sup> Kop awn' na, lawng ka hk'a ku' hk'a tan ri ruphtu na' yeuh a ki'. Yawng e' ruphtu na' meuh a ku' un' kue' peuehot' pang bhen' keute' aen' na. E' yawng Peucawo' kue' Eun ti ton' koe. <sup>5</sup> Kopti ku' klawng peue meuh peucawo' na' a saec' kue' heun' nang kuing' pang ma' na, a'ko' pang bhen' keute' na' (neumneum ka na' ko', "peucawo'" mae' "cawo'" na' kue' a heun'), <sup>6</sup> daecti pun e' na', kue' a Peucawo' ti ton' koe. Eun meuh A'kuiing'. Eun hpanpleng' ku ceu gawm'euc' na'. A'yu im' e' na' a meuh

pun Heun. A kue' Cawo' ti ton' koe, Eun meuh Yesu' Hkrit Eun. Peucawo' Eun hpanpleng' ku ceu gawm'euc' na' ri cu Eun Yesu' Hkrit Eun. E' kue' meuh kopti Heun ri.

<sup>7</sup> Daecti hpaw a ca' meuh peue ku peue nang yawng lawng aen' na. Peue ngon' na' hteum' peue ruphtu na' a'yu im' neum. Kop awn' na yam hk'a ce ku' hk'a tan ri ruphtu na', ce hteum' a meuh ku' hk'a tan ri peucawo' neumneum na'. Kopti hpum' cang yawng ce na' kaw'ring kloe ka, a yeuh ce hk'aw'jeuk. <sup>8</sup> Ku' hk'a na' hpaw a ca' meuh ku' kaw yeuh e' gawm de Peucawo' Eun. E' lawn un' hk'a a ko', a hkuin' kaw yeuh e' gawm yawm' lih. E' lawn hk'a a ko', a hkuin' kaw yeuh e' gawm chak' huk'.

<sup>9</sup> Daecti uin' sati ri reu'. Pawlaee kah ku' cang yeuh pun e' na' meuh meul' seumu seuduih ce ec'awng' kaw'ring kloe e' na' ce. <sup>10</sup> Kopti peue kaw'ring kloe ri hpum' cang yawng ri na' ce lawn nyu ku' meuh peue yawng lawng aen' a na' mok' pe' ri hk'a ku' hk'a hk'a'naee nya ka ruphtu na' ko', ce ku na' hpum' huk' ri hk'a ku' hk'a tan ri ruphtu na', un' meuh ka aw? <sup>11</sup> Kop awn' na kopti meuh a cu'yi pe' na', a yeuh ec'awng' kaw'ring kloe ku' Hkrit hkam' Eun ri yeum pun ce na' ce lulaic heul'. <sup>12</sup> Yam yeuh pe' map' na' ri ec'awng' ri na' ce yeuhki' na' mae' yeuh pe' ku' kleuc' ri hpum' cang yawng kaw'ring kloe ce na', pe' ku yeuh map' na' ri Hkrit Eun yeut. <sup>13</sup> Kop awn' na ku' hk'a ui' na' a lawn yeuh ec'awng' na' ce hk'uic' hk'a'naee map' na' ko', punta kaw ui' un' laee meuh ku' yeuh ce htang' meul na', ui' hkuin' kaw laee pawn' keune na' bae.

## 9

*Ku' peue caee Eun Yesu' kaw ce cang yeuh na'*

<sup>1</sup> Un' meuh ui' peue pon aw? Un' meuh ui' peue caee Eun Yesu' aw? Un' pun ui' ri nyu Cawo' e' Yesu' Eun aw? Un' meuh pe' pli' ka kan' yeuh ui' hk'a'naee Peucawo' Eun

na' aw? <sup>2</sup> Uí saec' na' un' meuh peue caee Eun Yesu' pun peue seubu na' ce ko', daecti pun pe' na' meuh uí taeng peue caee Eun Yesu'. Kopti meuh pe' ta'ra' ka hk'a' meuh uí peue caee Eun Yesu' na' hk'a'naee Peucawo' Eun na'.

<sup>3</sup> A'nhaw' lawn ing' taws' a'mu uí ko', ku' kaw uí kah' nha' ri na' kue' a yeuhki'. <sup>4</sup> Un' kue' e' ahkvang kaw hk'asom' aw? <sup>5</sup> Un' kue' e' ahkvang kaw va beun' ri meuh kon' Hkrit na' ce hot' ri seun' peue caee seubu Eun Yesu', awng' Eun Yesu' maeé Petru' na' ce yeut aw? <sup>6</sup> A'ko' meuh a Banabas' ya koe aw nang kah ri yeuh kan' pun kaw a'yu im' na'?

<sup>7</sup> A'nhaw' cí hk'a ku' chin ri eun yeuh suik'? A'nhaw' cí sang' val plí' bui eun un' pun ri hk'a plí' sang' ri neum val awn' na? A'nhaw' cí uii' tu'hkawng' eun un' pun ri nyui leuum' pui ka? <sup>8</sup> Lah' uí a yeuhki' na' a hot' kamkuit ce peue na' aw? Hk'a'naee leukah' ritroe na' un' lah' ka a seun' aen' na aw? <sup>9</sup> Kopti leukah' ritroe eun Mo'se na' a lah', "Pawlaee chui'p' moeng ka a'moe yam buih chok'chec' a ngho' na'."\* Yam Peucawo' lah' Eun a yeuh keutit' na', kuit Eun pun ka a'moe na' aw? <sup>10</sup> Un' lah' Eun a ri e' aw? Meuh, leukah' aen' tem' a ri pun e'. Kopti yam peue htaee' na cap' ngho' na', ce ku keutui' hpum' kaw ri pun hkawn' ka ku' vuic ku' cap' ri na'. <sup>11</sup> Ya lawn puin' ku' seumal ka hk'a' civit na' hk'a'naee pe' ya na' tang hk'o' ri vuic a ri pe' ko', na' pe' nyu a pon lheu' aw? <sup>12</sup> Peue seubu na' ce lawn kue' ahkvang kaw pun ri rap ri ti hk'a' teum'kawm pe' na' ko', ya jaen na' kue' ahkvang ka lheu' ce ri, un' meuh ka aw?

Daecti ya hkuin' lo' ahkvang awn' na. Lheu' awn' na, punta kaw a un' meuh ku' ham'tap leukah' mun' ren'kawn lawng Eun Hkrit na', ya yeun'hkam a ku ceu ka. <sup>13</sup> Un' yawng pe' peue yeuh kan' hk'a'naee nya hk'o'

\* 9:9 9:9 Saw'n leukah' mun' 25:4

mun' keuting na' pun ce ri hk'a ku' hk'a ka nya hk'o' mun' keuting na' aw'? Mae', un' yawng pe' peue yeuh mhai' nang ten dum ri tan na' pun ce bun ka ku' tan na' aw'? <sup>14</sup> Seun' awn' na, Yesu' tuil' Eun leukah' lah', "Peue sangsawn' leukah' mun' ren'kawn na' htuk' ce ri pun ku' kaw uii' a'yu ri na' ri leukah' mun' ren'kawn na' yeut."

<sup>15</sup> Daecti uí' hkuin' duing lo' ahkvang aen' ce. Tem' uí' a yeuhki' na' a hkuin' meuh keutui' hpum' uí' pe' kaw yeuh a ri uí'. Kaw uí' hkam' yawo ri yeum na' a jaen na' chak' hk'ai' kah uí' peue ti ri peue eun yeuh ku' mhawng' uí' ri hk'o'cuin aen' ce lulaic heul' na'. <sup>16</sup> Daecti yam sangsawn' uí' leukah' mun' ren'kawn na', a hkuin' kue' ku' yeuh uí' mhawng' ri hk'o'cuin kopti kaw uí' kah ri sangsawn' a na'. Uí' lawn un' sangsawn' leukah' mun' ren'kawn na' ko', kaw uí' pun ri hkam' hk'a' jha' na'. <sup>17</sup> Uí' lawn peus hpum' ri sangsawn' leukah' mun' ren'kawn na' ko', uí' kaw pun lapsawng'. Daecti uí' lawn yeuh a mae' un' peus ri hpum' ri ko', gup meuh uí' nang yeuh a hot' yawo beus ka na'. <sup>18</sup> Yeuh keutit' na', uí' ci' kaw pun lapsawng' keunhaw'? Punta kaw uí' un' lo' ahkvang ku' htuk' uí' ri pun ri leukah' mun' ren'kawn na' htonnuk na', yam sangsawn' uí' leukah' mun' ren'kawn na', uí' sangsawn' a mae' un' ti ri ngos reng ri.

<sup>19</sup> Uí' saec' na' meuh peue pon un' ut' hk'a'ruim a'nhaw' ko', punta kaw uí' cang va peue ing' yum' Peucawo' Eun heun' seun' cang va uí' na', uí' yawm' meun ri meuh mhai' peue gawm'euc'. <sup>20</sup> Pun peue Yu'da na' ce, punta kaw uí' cang va ce ing' yum' Peucawo' Eun na', uí' ku' seun' peue Yu'da na' ce yeut. Pun peue ut' hk'a'ruim ka leukah' ritroe na' ce, punta kaw uí' cang va ce ing' yum' Peucawo' Eun na', uí' ku' seun' peue ut' hk'a'ruim ka leukah' ritroe na' ce yeut (uí' ri meun, uí' saec' na' un' ut' hk'a'ruim ka leukah' ritroe na'). <sup>21</sup> Pun peue un' kue' leukah' ritroe na' ce, punta

kaw uí cang va ce ing' yum' Peucawo' Eun na', uí ku seun' peue un' kue' leukah' ritroe na' ce yeut (uí saec' na' un' pon ritroe Eun Peucawo' na', daecti ut' uí hk'a'ruim ka leukah' ritroe Eun Hkrit na'). <sup>22</sup> Pun peue kaw' reng kloe na' ce, punta kaw uí cang va ce ing' yum' Peucawo' Eun na', uí ku seun' peue kaw' reng kloe na' ce yeut. Punta kaw uí cang teum' kawm peue ti ri peue na' eun pun ri rap ri ti hk'a' htut lawtpon na' ri ku hk'a' ku ceu na' pun, uí meuh mae' peue ku ceu gawm' euc' na' ce. <sup>23</sup> Yeuh uí ceu nang aen' ce ku ceu na' meuh a kopti nyu uí leukah' mun' ren' kawn na' mae' meuh a punta kaw uí pun ri pawng' ri mae' mun' ka leukah' mun' ren' kawn na'.

<sup>24</sup> Peue keutec hk'uih hk'a'nae' vang keutec hk'uih na' hk'uih ce ku peue ri, daecti ku' pun lapsawng' na' eun meuh yawo ti peue, un' yawng pé' a aw? Punta kaw pé' pun lapsawng' na', hk'uih reu'. <sup>25</sup> Peue keutec hk'uih na' ce ku peue, kah ce ri sae' cae' hk'vui' ri nyawk'. Yeuh ce keuti' na' a meuh punta kaw ce pun lapsawng' un' keutawn' na'. Daecti yeuh e' punta kaw ri pun lapsawng' keutawn' cot' cu na'. <sup>26</sup> Kop awn' na, a hkuin' meuh hk'uih uí hk'a'nae' vang un' kue' uí vang kaw rot na'. A hkuin' meuh dhawc' uí vawo seun' peue hk'vui' ri dhawc' na' ce. <sup>27</sup> Daecti punta yam hawc' uí sangsawn' ri leukah' mun' ren' kawn na' ri peue na' kaw uí un' meuh nang un' kuing' ri pun lapsawng' na', uí hk'vui' meun ri kaw u'peung tu' ri na' pun.

## 10

*Tuil' sati ri kaw un' hot' ri yeuh seun' ku' yeuh ce a'ta' a'ya ce peue I'sarela' na'*

<sup>1</sup> Ec'awng' na' pé', sum' kah uí pé' yawng lawng ka ku' meuh neum ri a'ta' a'ya e' na' ce. Yam ut' ce nang vang hk'oh' hk'oeng' na', Peucawo' tuil' Eun putum' na'

kang'ruim ce, maeé' ce pun ri hpa' mha'seumut' na' heul' ku peue ri. <sup>2</sup> Ce pun ri ing' lec hk'a'naee Mo'se eun ri rap ce ri ti hk'a' cum' na' hk'a'naee putum' na' maeé' hk'a'naee mha'seumut' na' ku peue ri. <sup>3</sup> Ce pun ri hk'a' ku' hk'a' civit seun' puri na' ku peue ri. <sup>4</sup> Ce pun ri nyui leuum' civit seun' puri na' ku peue ri. Ce pun ri nyui leuum' civit lih neum seumu civit ku' a hot' ce heul' na'. Meul' seumu awn' a meuh Hkrit Eun. <sup>5</sup> A saec' yeuh sa'nhaw', Peucawo' Eun nyu ce un' htuk' hpum' ri hk'a' heun'. A'ta' a'ya awn' ce pun ri yeum buba ri nang vang hk'oh'hk'oeng' na'.

<sup>6</sup> Ceu nang aen' puc a ri meuh na' meuh a punta kaw a tuil' sati un' kah hpum' e' na' ren' maeé' ku' rai na' seun' peue awn' ce. <sup>7</sup> Pawlaee faeé' ruphtu na' seun' ce ri ngon' faeé' ce a na' seun' tem' a ri nang htawm Seunga' na', "Peue na' mok' ce ri nyui plai' hk'asom'. Ce kuh' ren'kawn cha ri lomlom."\* <sup>8</sup> E' na' htuk' ri un' yeuh ku' kleuc' hk'a' hkuit'nawng'tang' na' seun' peue ngon' na' yeuh ce a. Hawc' ka na', ce yeum lal'mhuin' loe'heng' peue hk'a'naee ti seunyi na'. <sup>9</sup> E' na' htuk' ri un' cheu ri nawk Peucawo' Eun seun' peue ngon' na' yeuh ce a. Hawc' ka na', seueueng' na' a tok' ce yeum. <sup>10</sup> E' na' htuk' ri un' buicbuic seun' peue ngon' na' yeuh ce a. Hawc' ka na', in'hpom ka hk'a' yeum na' eun toh ce.

<sup>11</sup> Ceu nang aen' puc a ri meuh ri ce na' meuh a punta kaw a tuil' sati e' ku' ut' hk'a'naee cu yam tisut' na' e'. A pun ri tem' ri hk'a'naee htawm Seunga' na'. <sup>12</sup> Kop awn' na, pe' lawn kuit meun ri cawng keutawn' meulamlam ri hawc' ko', punta kaw pe' un' cang htang'meul na', uin' sati ri meulamlam ri reu'. <sup>13</sup> Hk'a' cop'long pon lheu' hk'ai' ku' tawn hk'eup' peue na' a hkuin' kaw laee kue' ri pe'. Peucawo' kati keutawn' Eun. Eun hkuin' kaw tae' pe' hk'eup' ku' cop'long kaw pe' hkam' un' pe na'. Daecti yam

\* [10:7](#) [10:7](#) Pucti heul' [32:6](#)



hkam' pe' ku' cop'long na', punta kaw pe' cang keutawn' hk'a'ruim ka hk'a' cop'long na' pun, Eun kaw tuil' pe' is' hk'a' kaw pucti heul' na' yeut.

*Hk'a ku' hk'a tan ri ruphtu mae' hk'a pawe Eun Cawo'*

<sup>14</sup> Kop awn' na peue leumeus' ui' na' pe', vel hk'a' faee' ruphtu na' reu'. <sup>15</sup> Lah' ui' a ri peue cang kuit ri mhawng' na' ce. Pe' na' caet ri nawk ku' lah' ui' na' meun reu'. <sup>16</sup> Kawk' leuum' pli' bui ku' hk'o' e' mun' e' mun' keuting ri Peucawo' Eun na' yeuh ka e' pawng' ri hk'a'naee nham' Eun Hkrit na', un' meuh ka aw? Hkawomun' ku' ves e' na' yeuh ka e' pawng' ri hk'a'naee jawngku' tu' Eun Hkrit na', un' meuh ka aw? <sup>17</sup> Kopti meuh a hkawomun' ti meul' na' e' meuh jawngku' tu' keuhti yawo, kopti ruim e' ri hk'a' hkawomun' ti meul' awn' a na'.

<sup>18</sup> Kuit ri nawk ku' yeuh ce peue I'sarela' na' reu'. Peue hk'a ku' tan hawc' tan ri na' pun ce ri pawng' ri mae' ten dum ri tan na', un' meuh ka aw? <sup>19</sup> Vangdoh' ka ku' sum' lah' ui' na' meuh a ruphtu na' mae' ku' tan na' kue' a a'ye' keuting aw? <sup>20</sup> Un' meuh, daecti vangdoh' ka ku' sum' lah' ui' na' meuh a ku' tan ce peue un' meuh kon' Hkrit na' tan ce a ri seuca' na', hpaw ce ca' tan a ri Peucawo' Eun. Ui' hkuin' sum' kah pe' pawng' ri mae' seuca' na'. <sup>21</sup> Nyui pe' kaw' Eun Cawo' Yesu' na' pe' ku' nyui kaw' ka seuca' na', a hkuin' kaw cang. Hk'a pe' ri hpuin' Eun Cawo' Yesu' na' pe' ku' hk'a ri hpuin' ka seuca' na', a hkuin' kaw cang. <sup>22</sup> Kaw e' cu'ci' yeuh Cawo' Yesu' Eun hkoe'mang' aw? Kaw' reng keuting e' hk'ai' Heun aw?

*Ku' peue yum' na' cang yeuh ce*

<sup>23</sup> Tem' pe' lai ri ui' pe' lah', "Cang yeuh e' ku' ceu na' gawm'euc'." Daecti ui' lah' a ri pe', ku' yeuh e' ku' ceu na' a hkuin' kue' peuehot' gawm'euc'. Cang yeuh e' ku' ceu na' gawm'euc'. Daecti ku' yeuh e' ku' ceu na' a hkuin' yeuh ri

## 1 Kaw'rinhtu' 10:24261 Kaw'rinhtu' 10:33

tuil' hk'a' huk'hawn' na' gawm'euc'. <sup>24</sup> Un' htuk' e' ri keue' ri ku' kaw sawng' kue' peuehot' pun tu' ri na', daecti keue' ri ku' kaw kue' peuehot' pun peue seubu na' ce reu'.

<sup>25</sup> Ku' paing' ri nang keulas paing' keune na' cang hk'a' pe' a gawm'euc' ka. Pawlaee hki'keung ri kaw a cawp' un' cawp' na'. <sup>26</sup> Kopti bhen' keute' na' mae' ku' kue' hk'a' pang ka bhen' keute' na' ce gawm'euc' meuh a is' Eun Peucawo'.†

<sup>27</sup> Peue un' yum' ti ri peue na' eun lawn klawng pe' heul' hk'asom' mae' ti pe' ku' sum' heul' ko', hk'a' ku' hk'a' bang' ri nanggal' pe' na' reu'. Pawlaee hki'keung ri kaw a cawp' un' cawp' na'. <sup>28</sup> Daecti peue ti ri peue eun lawn lah', "Aen' meuh a ku' hk'a' tan ri ruphtu hawc' na'" ko', kopti meuh a ku' lah' a ri mi na' eun mae' kopti meuh a hpum' cang yawng na', pawlaee hk'a' a. <sup>29</sup> Hpum' cang yawng lah' ui' na' a hkuin' meuh is' pe' na', daecti meuh a hpum' cang yawng eun ku' lah' a ri pe' na' eun. A ci' meuh kop keunhaw' hpum' cang yawng ce peue seubu na' a vae' ing' ham'tap ku' cang yeuh pun ui' na'? <sup>30</sup> Ui' lawn hk'a' a hk'a'nae' mun' keuting ui' ri Peucawo' Eun ko', a ci' yeuh keunhaw' eun vae' tawk ui' kopti ku' mun' keuting ui' ri Peucawo' Eun hawc' na'?

<sup>31</sup> Kop awn' na, yam hk'a' pe', yam nyui pe', a'ko' yam yeuh pe' ku' ti ri ceu na', yeuh a punta kaw a tuil' munhpung' Eun Peucawo' na' reu'. <sup>32</sup> Pawlaee yeuh ri meuh kleum' ka vang seuduih leuveul' ce peue Yu'da na', a'ko' peue Helasa' na', a'ko' peue kon' Hkrit Eun Peucawo' na' ce. <sup>33</sup> Daecti yeuh seun' ku' yeuh ui' na' reu'. Co'ca' ui' ri yeuh ku' yeuh ui' ku' ceu na' kaw a htuk' hpum' peue gawm'euc' na'. Kopti hpaw ui' ca' sok ri yeuh ku' kaw kue' peuehot' pun tu' ri na' meun, daecti punta peue gawm'euc'

---

† 10:26 10:26 Suk'seun' 24:1

na' kaw ce pun ri rap ri ti hk'a' htut lawtpon na', ui' sok ri yeuh ku' kaw kue' peuehot' pun ce na'.

## 11

<sup>1</sup> Hot' ri yeuh seun' ku' yeuh ui' na' seun' hot' ui' ri yeuh ku' yeuh Eun Hkrit na' reu'.

*Ku' kuing' ri yeuh yam hk'o' mun' mae' yam sangsawn' leukah' mun' ren'kawn na'*

<sup>2</sup> Suk'seun' ui' pe' kopti un' pil pe' leukah' sangsawn' ui' na', pe' jhawp' a ku' ceu ka hot' seun' ku' sangsawn' ui' ri pe' na'.

<sup>3</sup> Daecti sum' kah ui' pe' pawn Hkrit meuh Eun cing' ce me na' ce ku' peue ri, me na' eun meuh cing' eun beun' na', Peucawo' Eun meuh cing' Eun Hkrit. <sup>4</sup> Me ku' peue na' yam hk'o' ce mun' na', a'ko' yam sangsawn' ce leukah' mun' ren'kawn na' ce lawn chui'p' cing' ri na' ri hpen' ko', yeuh ce ku' hpa'rai ri cing' ri na'. <sup>5</sup> Beun' ku' peue na' yam hk'o' ce mun' na', a'ko' yam sangsawn' ce leukah' mun' ren'kawn na' ce lawn un' chui'p' cing' ri na' ri hpen' ko', yeuh ce ku' hpa'rai ri cing' ri na' seun' kon' ce cing' ri na' ko'. <sup>6</sup> Beun' na' ce lawn un' chui'p' cing' ri na' ri hpen' ko', ce na' htuk' ri cip' ri tec huik' ri na'. Daecti kopti cip' huik' ri, a'ko' kon' cing' ri na' meuh a ku' hk'o'kaic pun ce na', ce na' htuk' ri chui'p' cing' ri na' ri hpen'. <sup>7</sup> Me na' kopti meuh ce ruprang munhpung' Eun Peucawo' na', ce na' htuk' ri un' chui'p' cing' ri na' ri hpen'. Daecti beun' na' ce meuh munhpung' ce me na'. <sup>8</sup> Kopti me na' hpaw eun ca' hpanpleng' eun ri neum beun', beun' na' hpanpleng' eun ri neum me. <sup>9</sup> Me na' hpaw eun ca' hpanpleng' ri pun beun'. Beun' na' hpanpleng' eun ri pun me. <sup>10</sup> Kop awn' na, kopti meuh a in'hpom na' ce, punta beun' na' kaw ce yeuh ut' ri hk'a'ruim ti'ca ce me na' pucti lih na', ce na' htuk' ri chui'p' cing' ri na' ri hpen'.

<sup>11</sup> A saec' yeuh sa'nhaw', hk'a'naee Cawo' Yesu' Eun, beun' na' kah ce ri puing me, me na' ce ku kah ri puing beun'. <sup>12</sup> Kopti beun' na' ing' ce neum me na', me na' ce ku keut' lih neum beun' yeut. Daecti ku ceu gawm'euc' na' ing' a neum Peucawo' Eun. <sup>13</sup> Yam beun' na' hk'o' ce mun' ri Peucawo' Eun na', htuk' ce ri chuip' cing' ri na' aw, un' htuk' ce ri chuip' a aw, kuit pe' nawk a meun reu'? <sup>14</sup> Me na' eun lawn leuving' huik' ri na' ko', meuh a ku' hk'o'kaic pun heun na', hpum' cang yawng pe' na' un' sawn' a pe' ri ka aw? <sup>15</sup> Daecti beun' kue' huik' lang' na' meuh a munhpung' ce kopti Peucawo' tuil' Eun ce is' huik' lang' na' meuh a punta kaw a chuip' cing' ce na'. <sup>16</sup> A'nhaw' lawn sum' htu'hting' lawng aen' a ko', ya ri maeé muk kon' Hkrit Eun Peucawo' na' e' hkuin' kue' ritroe seubu.

*Lawng hk'a pawe Eun Cawo'*

<sup>17</sup> Yam hk'om pe' puri hk'o' mun' na', hpaw uí' ca' kaw cang suk'seun' pe' kopti hk'om pe' puri hk'o' mun' na' pun pe' hk'a' un' chak' na' heun' hk'ai' ku' chak' na'. <sup>18</sup> Keuhti ka na', pun uí' ri mhawng' yam hk'om pe' puri hk'a'naee muk kon' Hkrit na', pe' gvah muk gvah cum puri. Uí' yum' lawng ku' pun uí' ri mhawng' awn' ngon' meuh a neumneum yeut. <sup>19</sup> Punta hk'a'naee pe' na' a'nhaw' cí meuh peue Peucawo' htawhkam Eun na' punta kaw a pucti lih glih'gleueng' na', a ca' lak' koe kaw kue' hk'a' gvah muk gvah cum puri na' aw? <sup>20</sup> Yam hk'om pe' puri na', hpaw pe' ca' hk'a' pawe Eun Cawo' na'. <sup>21</sup> Kopti un' laee ko' pe' puri pe' sawng' hk'a' is' a'nhaw' is' nang awn' na'. Ngon' pe' sum' som', ngon' pe' yuic' ri leuum' plí' bui na'. <sup>22</sup> Un' kue' pe' nyahk'ul' vang kaw pe' mok' ri hk'asom' aw? A'ko', yeuh pe' ku' un' nawpsang ri muk kon' Hkrit Eun Peucawo' na' ce ri yeuh pe' peue hk'o'tukyak na' ce kaic aw? Uí' cí kaw htuk' ri lah' a yeuh sa'nhaw' ri pe'? Kaw pe' kah uí'

suk'seun' ri kopti ceu nang aen' ce aw? A hkuin' kaw duing yeuh keutit'.

<sup>23</sup> Kopti ku' sangsawn' ui' pe' ri ka na' pun ui' a neum Cawo' Yesu' Eun. Aen' a, bul yam fuin peue Cawo' Yesu' Eun na' Eun ti hkawomun' na'. <sup>24</sup> Hawc' Eun mun' keuting ri Peucawo' Eun na', Eun ves hkawomun' na' Eun lah', "Aen' meuh a tu' Ui' tuil' Ui' a ri pe'. Yeuh aen' a meuh ku' kaw kuit rot ri Ui' reu'." <sup>25</sup> Hawc' hk'a ce hkawomun' na', Eun tang yeuh seun' awn' na. Eun ti kawk' na' Eun lah', "Aen' meuh a kati sat'ca' hk'u' ri nham' Ui'. Yam nyui pe' a ku pok ka na', yeuh aen' a meuh ku' kaw kuit rot ri Ui' reu'." <sup>26</sup> Kopti yam hk'a pe' hkawomun' aen' a mae'e yam nyui pe' kawk' aen' a ku pok ka na', meuh a pa'o' pe' lawng hk'a' yeum Eun Cawo' Yesu' na' rot ti yam na' Eun tang lih na'.

<sup>27</sup> Kop awn' na, a'nhaw' lawn hk'a hkawomun' na' mae'e nyui kawk' Eun Cawo' Yesu' na' mae'e un' nawpsang ri Heun ko', hkawn' eun ku yeuh ku' kleuc' ri tu' mae'e nham' Eun Cawo' Yesu' na'. <sup>28</sup> Kop awn' na, nanggal' ka kaw e' hk'a hkawomun' na' mae'e nyui kawk' aen' a na', htuk' e' ri sawng' caet ri nawk tu' ri na' meun. <sup>29</sup> Kopti a'nhaw' lawn hk'a a mae'e nyui a hk'a'nae' un' kuit eun ri nawk tu' Eun Cawo' Yesu' na' ko', hkawn' eun ku hk'a ku nyui ku' kaw yeuh eun pun hk'a' taws' a' mu ciyang na'. <sup>30</sup> Kopti meuh a ceu nang aen' ce na', pe' ri heun' peue pe' kaw' reng klo'e sui' peuyhat, ngon' pe' yeum. <sup>31</sup> Daecti e' lawn sawng' caet ri nawk tu' ri na' meun ko', e' hkuin' kaw laee pun hk'a' taws' a' mu na'. <sup>32</sup> Yam Cawo' Yesu' tawm' ram Eun ri e' na', ta'faet' sawn' Eun e' punta kaw e' un' pun ri hkam' hk'a' ciyang na' mae'e peue bhen' keute' na' ce tiduih' na'.

<sup>33</sup> Kop awn' na ec'awng' ui' na' pe', yam hk'om pe' puri kaw hk'a pawe Eun Cawo' na', ko' puri ti peue hawc' ti peue reu'. <sup>34</sup> Punta yam ing' hk'om pe' puri na' pe' ku na' un' pun

ri hkam' hk'a' taws' a'mu ciyang na', a'nhaw' lawn sum' som' ko', eun na' htuk' ri som' ti nya ri.

Yam na' ui' tang ing' rot ri pe' na', ui' na' koe tang tuil' hk'a' sangsawn' seubu na' ri pe' bae.

## 12

### *Lapsawng' ka hk'a' civit*

<sup>1</sup> Ec'awng' na' pe', sum' kah ui' pe' yawng lawng lapsawng' ka hk'a' civit na'. <sup>2</sup> Pe' ku yawng yam kaw'n' meuh pe' peue un' yum' Peucawo' Eun na' pun pe' ri hkam' hk'a' va peue pe' long hk'a' kleuc' heul' faee' ruphtu ku' un' cang leukah' na'. <sup>3</sup> Kop awn' na, ui' sum' kah pe' yawng a, hpaw a ca' kue' a'nhaw' eun na' cu Cit' seunga' Eun Peucawo' na' eun na' lah, "Kah Yesu' Eun pun ri hkam' hk'a' jha' na' reu'." Mae' hpaw a ca' kue' a'nhaw' eun na' un' cu Cit' seunga' chak' na' eun na' lah, "Yesu' meuh Eun Cawo'."

<sup>4</sup> Lapsawng' na' kue' a heun' ceu, daecti Cit' seunga' ku' meuh nang tuil' a na' Eun meuh yawo ti ton'. <sup>5</sup> Kan' yeuh mhai' na' kue' a heun' ceu, daecti Cawo' yeuh e' mhai' Eun na' Eun meuh yawo ti ton'. <sup>6</sup> Kan' na' kue' a heun' ceu, daecti Peucawo' Cawo' yeuh kan' hk'a' naee e' na' Eun meuh yawo ti ton'.

<sup>7</sup> Lapsawng' ka Cit' seunga' na' tuil' a ri ri peue ku peue punta kaw a kue' mun' pun peue gawm'euc' na'. <sup>8</sup> Ti peue eun ko' Cit' seunga' na' a tuil' eun is' leukah' kue' cu'yi na'. Ku' seubu ti peue na' eun ko', Cit' seunga' ti ton' awn' a tuil' eun is' leukah' cang yeuh peue yawng na'. <sup>9</sup> Ku' seubu ti peue na' eun ko', Cit' seunga' ti ton' awn' a tuil' eun is' hk'a' yum' na'. Ku' seubu ti peue na' eun ko', Cit' seunga' ti ton' awn' a tuil' eun is' lapsawng' cang bai' peue cuin na'. <sup>10</sup> Ku' seubu ti peue na' eun ko', a tuil' eun is' ti'ca cang yeuh ku' hk'o'am' na'. Ku' seubu ti peue na' eun ko', a tuil' eun is' hk'a' cang sangsawn' leukah' mun' ren'kawn na'.

Ku' seubu ti peue na' eun ko', a tuil' eun is' hk'a' cang gvah cit' na' ce. Ku' seubu ti peue na' eun ko', a tuil' eun is' hk'a' cang lah' leukah' un' duing mhawng' na'. Ku' seubu ti peue na' eun ko', a tuil' eun is' hk'a' cang ti vangdoh' ka leukah' un' duing mhawng' na'. <sup>11</sup> Ceu nang aen' ce gawm'euc' a meuh kan' yeuh ka Cit' seunga' ti ton' koe na'. A tuil' ceu nang aen' ce ri peue ku peue na' ce hot' seun' ku tang' a ri uin' na' ko'.

*Jawngkui' tu' keuhti na' kue' a hk'eung heun'*

<sup>12</sup> Jawngkui' tu' na' a saec' pawng' ri mae' hk'eung heun' hk'eung na', a meuh yawo jawngkui' tu' keuhti. Hk'eung na' a saec' kue' heun' hk'eung, a pawng' ri meuh yawo jawngkui' tu' keuhti. Hkrit Eun ku seun' awn' a yeut. <sup>13</sup> Kopti e' ri gawm'euc' pun e' ri rap ri ti hk'a' cum' na' e' pawng' ri meuh yawo jawngkui' tu' keuhti ri Cit' seunga' keuhti na'. E' saec' na' meuh peue Yu'da, a'ko' peue Helasa', meuh peue meuh mhai', a'ko' peue pon, e' ri gawm'euc', pun e' ri rap ri ti Cit' seunga' keuhti awn' na.

<sup>14</sup> Jawngkui' tu' na' hpaw a ca' pawng' ri mae' hk'eung keuhti na' palkoe, daecti a pawng' ri mae' hk'eung heun' ceu na'. <sup>15</sup> Cung na' a lawn lah', "Kopti un' meuh ui' ti' na', ui' hkuin' meuh hk'eung ka jawngkui' tu' na'." Kopti lah' ka a yeuh keutit' na', a hkuin' to' ri yeuh ri un' laee meuh hk'eung ka jawngkui' tu' na'. <sup>16</sup> Yhuk' na' a lawn lah', "Kopti un' meuh ui' ngai' na', ui' hkuin' meuh hk'eung ka jawngkui' tu' na'." Kopti lah' ka a yeuh keutit' na', a hkuin' to' ri yeuh ri un' laee meuh hk'eung ka jawngkui' tu' na'.

<sup>17</sup> Jawngkui' tu' na' gawm'euc' a lawn meuh pal ngai' ko', a ci' kaw kue' hk'a' cang mhawng' na' tawngnhaw' ri na'? Jawngkui' tu' na' gawm'euc' a lawn meuh pal yhuk' ko', a ci' kaw kue' hk'a' cang mhawng' saeo' na' tawngnhaw' ri na'?

<sup>18</sup> Daecti neumneum ka na' ko', Peucawo' rangraen Eun ri

uin' hk'eung ku ceu na' ut' ri jawngkui' tu' na' hot' vang cawp' ka alo Eun na'. <sup>19</sup> Gawm'euc' ka a lawn meuh yawo hk'eung na' keuhti ko', tu' na' a ci' kaw kue' tawngnhaw'? <sup>20</sup> Seun' awn' na, a kue' hk'eung na' heun' ceu, daecti a kue' yawo jawngkui' tu' keuhti.

<sup>21</sup> Ngai' na' a hkuin' kaw cang lah' a ri ti' na', "Hpaw ui' ca' lo' mi." Cing' na' a hkuin' kaw cang lah' a ri cung na', "Hpaw ui' ca' lo' mi." <sup>22</sup> Neumneum ka na' ko', hk'eung ku' nyu e' kaw' reng kloe hk'a'naee jawngkui' tu' ri na' a lawn un' kue' a hkuin' kaw pun. <sup>23</sup> Hk'eung ku' nyu e' un' chae' kue' munhpung' na' e' jaen kaw yeuh a gawm kue' munhpung' heun'. Hk'eung ku' un' chae' sum' nyu e' na', e' jaen kaw yeuh a gawm hk'o'nawk. <sup>24</sup> Daecti hk'eung ku' nyu e' hk'o'nawk ri is' ut' hawc' na' a hkuin' kaw laee lo' ri mhe' ri. Daecti Peucawo' pawng' Eun hk'eung ku ceu ka jawngkui' tu' na' tiduih'. Hk'eung ku' un' kue' munhpung' na' Eun yeuh a gawm kue' munhpung' heun'. <sup>25</sup> Aen' meuh a punta hk'a' taic' jah hk'ai' puri na' kaw a un' kue' hk'a'naee jawngkui' tu' na'. Daecti aen' a meuh punta hk'eung ti ceu hawc' ti ceu na' kaw a kuit pun puri na'. <sup>26</sup> Hk'eung na' a lawn sui' ti ceu ko', hk'eung ku ceu na' a ku kaw sui' gawm'euc' ri. Hk'eung na' a lawn kue' munhpung' ti ceu ko', hk'eung ku ceu na' a ku kaw ren'kawn mae' ka.

<sup>27</sup> Meuh pe' jawngkui' tu' Eun Hkrit. Pe' ri ti peue hawc' ti peue pe' meuh hk'eung ka jawngkui' tu' awn' a. <sup>28</sup> Hk'a'naee muk kon' Hkrit na' Peucawo' tang' Eun ri uin' peue caee Eun Yesu' na' ce nanggal'. Lal' muk ti muk na' Eun tang' ri uin' peue sangsawn' leukah' mun' ren'kawn na' ce. Lo'e' muk ti muk na' Eun tang' ri uin' peue sangsawn' na' ce. Hawc' ka na' Eun tang' ri uin' peue yeuh ku' hk'o'am', peue kue' lapsawng' cang bai' peue peuyhat na' ce cuin, peue cang teum'kawm peue, peue kue' lapsawng' meuh ro'kan mae' peue cang lah' leukah'



un' duing mhawng' na' ce. <sup>29</sup> Meuh peue nang meuh peue caee Eun Yesu' ku peue ri aw? Meuh peue sangsawn' leukah' mun' ren'kawn ku peue ri aw? Meuh peue nang sangsawn' ku peue ri aw? Meuh peue nang yeuh ku' hk'o'am' ku peue ri aw? <sup>30</sup> Meuh peue nang pun lapsawng' cang bai' peue peuyhat na' ce cuin ku peue ri aw? Meuh peue nang cang lah' leukah' un' duing' mhawng' na' ku peue ri aw? Meuh peue nang cang ti vangdoh' ka leukah' un' duing mhawng' na' ku peue ri aw? <sup>31</sup> Daecti htuk' pe' ri kue' hpum' sum' is' lapsawng' ku' chak' hk'ai' aen' a na' ku peue ri.

### *Hk'a' leumeus'keus*

Maet'maen', kaw ui' tuil' pe' nawk hk'a' chak' hk'ai' peue na'.

## 13

<sup>1</sup> Ui' saec' na' cang lah' leukah' ce peue na' mae' leukah' ce in'hpom ku' un' duing mhawng' ui' na' daecti ui' lawn un' kue' hk'a' leumeus'keus na' ko', gup seun' ui' seng' laws' ka mong' mong', a'ko' chawm' chae' na' ko'. <sup>2</sup> Ui' saec' na' kue' lapsawng' ka sangsawn' leukah' mun' ren'kawn na', a'ko' ui' cang yawng ku' vangdoh' rui' ka leukah' mo' ri na', a'ko' ui' kue' cu'yi na' gawm'euc', a'ko' ui' kue' hk'a' yum' cang kah gong na' ce sat' ri pun na' daecti ui' lawn un' kue' hk'a' leumeus'keus na' ko', ui' hkuin' kue' ngos saec' peunaé. <sup>3</sup> Ui' saec' na' yawm' ri tan hk'eung ri na' gawm'euc' ri peue hk'o'tukyak na' ce, a'ko' ui' yawm' ri sum tu' ri na' heul' dum a hk'a'naee ngawl na', daecti ui' lawn un' kue' hk'a' leumeus'keus na' ko', ui' hkuin' pun mun' na' saec' peunaé.

<sup>4</sup> Hk'a' leumeus'keus na' cang yeun' hkam ling', cang tukyak. Hk'a' leumeus'keus na' un' hko'e' mang', un'

mhawng' ri hk'o'cuin, un' kue' hpum' lhung' hpum' keuting. <sup>5</sup> Hk'a' leumeus'keus na' un' yeuh ku' un' nawpsang, un' kuit pun tu' ri meun koe, un' hpum' dot', un' cang kue' hpum' ri peue. <sup>6</sup> Hk'a' leumeus'keus na' un' ren' mae' ku' kleuc', daecti ren' mae' ku' meuh neum na'. <sup>7</sup> Hk'a' leumeus'keus na' cang yeun'hkam ku ceu, yum' laleung, keutui' hpum' laleung mae' yeun'hkam ri hk'a' ku ceu na'.

<sup>8</sup> Saec' meuh hk'a' sangsawn' leukah' mun' ren'kawn na' a kaw yut' ri, saec' meuh hk'a' lah' leukah' un' duing mhawng' na' a kaw yen', saec' meuh cu'yi cang yawng na' a kaw sut', daecti hk'a' leumeus'keus na' a hkuin' kaw cang lulaic heul'. <sup>9</sup> Kopti cu'yi cang yawng e' na' a hkuin' htonnuk, hk'a' sangsawn' leukah' mun' e' na' a ku hkuin' htonnuk yeut. <sup>10</sup> Daecti yam hk'a' htonnuk na' rot ka na', hk'a' un' htonnuk na' a kaw rai' heul'. <sup>11</sup> Yam kawn' buih meuh ui' kon' nyom na', ui' leukah' seun' kon' nyom, ui' kuit seun' kon' nyom, ui' a'cang' seun' kon' nyom. Daecti yam keuting meuh ui' nang heng' na', ui' tecla hk'a' yeuh ce kon' nyom na'. <sup>12</sup> Maet'maen' seun' a nom' e' vaen un' hkaem na' ko', daecti yam awn' a ko', kaw e' pun ri nyu buh Eun Peucawo' na' glih'gleueng'. Maet'maen' cu'yi ui' na' a hkuin' nang htonnuk, daecti yam awn' a ko', ui' kaw yawng glih'gleueng' seun' Peucawo' yawng Eun ui' na'.

<sup>13</sup> Kop awn' na, maet'maen' kue' a loe' ceu. Aen' ce a meuh hk'a' yum', hk'a' keutui' hpum' mae' hk'a' leumeus'keus na'. Daecti hk'a' leumeus'keus na' a keuting hk'ai' ce.

## 14

*Lapsawng' cang sangsawn' leukah' mun' ren'kawn mae' lapsawng' cang lah' leukah' un' duing mhawng'*

<sup>1</sup> A'yu im' hk'a' naee hk'a' leumeus'keus na' mae' sae'-caee' hot' ri sok lapsawng' ka hk'a' civit na' ce reu'.

Jaen hot' ri sok lapsawng' cang sangsawn' leukah' mun' ren'kawn na' reu'. <sup>2</sup> Kopti peue lah' leukah' un' duing mhawng' na' hpaw ce ca' leukah' mae' peue, daecti leukah' ce mae' Peucawo' Eun. Kopti a'nhaw' hkuin' leuceng pun ku' lah' ce na' saec' ti peue, daecti lah' ce lawng vangdoh' rui' ka hk'a' Cit' seunga' na'. <sup>3</sup> Daecti peue sangsawn' leukah' mun' ren'kawn na' leukah' ce mae' peue. A yeuh peue huk'hawn', kue' kaw'l'reng, hpum' sam'ran. <sup>4</sup> Peue lah' leukah' un' duing mhawng' na' yeuh a ce huk'hawn' meun koe. Daecti peue sangsawn' leukah' mun' ren'kawn na' yeuh a muk kon' Hkrit na' ce huk'hawn'. <sup>5</sup> Sum' kah uí' pe' cang lah' leukah' un' duing mhawng' pe' na'. Daecti lheu' awn' na, uí' sum' kah pe' cang sangsawn' leukah' mun' ren'kawn na', kopti peue cang lah' leukah' un' duing mhawng' na' ce lawn un' cang ti vangdoh' ka na' lih punta muk kon' Hkrit kaw ce pun ri rap ri ti hk'a' huk'hawn' na' ko', peue cang sangsawn' leukah' mun' ren'kawn na' keuting ce hk'ai' peue cang lah' leukah' un' duing mhawng' na' ce.

<sup>6</sup> Ec'awng' na' pe', uí' saec' na' ing' lah' leukah' un' duing mhawng' na' ri pe' daecti uí' lawn un' lah' leukah' Peucawo' tuh' Eun ri tuil' na', a'ko' leukah' cu'yi na', a'ko' leukah' sangsawn' leukah' mun' ren'kawn na', a'ko' leukah' sangsawn' na' ko', a ci' kaw kue' mun' keunhaw' pun pe'? <sup>7</sup> Saec' meuh ku' un' kue' a'yu na', pi', a'ko' ting', a lawn un' hot' not na' meulamlam ri ko', a'nhaw' ci' kaw yawng hot' a not nanghaw' na'? <sup>8</sup> Pi'tae'rae' suik' na' a lawn un' seng' hkaem ko', a'nhaw' ci' kaw rangraen ri kaw peueng' suik' na'. <sup>9</sup> Pe' ku seun' awn' na yeut. Pe' lawn lah' leukah' leuceng un' pun peue na' ko', a'nhaw' ci' kaw leuceng pun ku' buih lah' pe' na' yeuh sa'nhaw'? Gup seun' a leukah' pe' mae' vawo na' ko'. <sup>10</sup> Pang bhen' keute' aen' kue' a leukah' na' heun' ceu. Leukah' un' kue' vangdoh' na' a hkuin' kue'

saec' ti ceu. <sup>11</sup> Daecti uí lawn un' leuceng pun vangdoh' ka leukah' awn' a ko', ku' leukah' na' eun maeé uí ri ya sawng'sawng' meuh peue ceu chat puri. <sup>12</sup> Kop awn' na saec' meuh pé ri, kopti buih hot' pé ri sok lapsawng' ka Cit' seunga' na', co'ca' ri sok lapsawng' ku' kaw yeuh muk kon' Hkrit na' ce huk'hawn' na' reu'.

<sup>13</sup> Kopti meuh a ceu nang aen' a na', a'nhaw' lawn cang lah' leukah' un' duing' mhawng' na' ko', htuk' eun ri hk'o' mun' punta kaw eun cang ti vangdoh' ka ku' lah' ri na' lih. <sup>14</sup> Kopti uí lawn hk'o' mun' lah' leukah' un' duing' mhawng' na' ko', cit' uí na' a saec' na' hk'o' mun', daecti hpum' uí na' a hkuin' pun mun'. <sup>15</sup> Yeuh keutit' ko', uí cí na' htuk' ri yeuh sa'nhaw'? Kaw uí hk'o' mun' ri cit' ri na', daecti uí ku kaw hk'o' mun' ri hpum' ri na' yeut. Uí kaw cai suk'seun' ri cit' ri na', daecti uí ku kaw cai suk'seun' ri hpum' ri na' yeut. <sup>16</sup> Kopti pé lawn suk'seun' Peucawo' Eun ri cit' ri na' palkoe ko', peue un' leuceng pun na' kopti un' leuceng pun ce ku' lah' pé na', ce cí kaw cang lah' "Amin" ri yam hk'o' pé leukah' mun' keuting na' yeuh sa'nhaw'? <sup>17</sup> Pé saec' na' lah' leukah' mun' keuting hk'o' leuceng nyawk' na', daecti a hkuin' cang yeuh peue seubu na' ce huk'hawn'.

<sup>18</sup> Kopti cang lah' uí leukah' un' duing' mhawng' na heun' hk'ai' pé na', uí mun' keuting ri Peucawo' Eun. <sup>19</sup> Daecti hk'a'naee muk kon' Hkrit na', lah' uí leukah' leuceng pun ku' kaw cang teum'kawm peue hpawn' moeng na' a na' chak' hk'ai' lah' uí leukah' un' duing' mhawng' timhuin' moeng na'.

<sup>20</sup> Ec'awng' na' pé, pawlaee kah kamkuit pé na' seun' kon' nyom. Hk'a' rai pé na' yeuh ri meuh seun' o'ngak reu'. Daecti kamkuit pé na' yeuh ri meuh seun' nang heng' reu'.

<sup>21</sup> Seun' tem' a ri uin' ri nang htawm Seunga' na',

Peucawo' Eun lah',  
 "Kaw Uí cu peue ceu seubu na' ce

mae' cu Ui' hoeng' ce peue ceu seubu na'  
Ui' kaw leukah' mae' peue aen' ce.

Daecti ce hkuin' kaw leuceng Ui'”\*

<sup>22</sup> Kop awn' na, hk'a' lah' leukah' un' duing mhawng' na' a hkuin' meuh het' pun ce peue yum' na', daecti a meuh het' pun ce peue un' yum' na'. Daecti hk'a' sangsawn' leukah' mun' ren'kawn na' a hkuin' meuh pun ce peue un' yum' na', daecti a meuh pun ce peue yum' na'. <sup>23</sup> Kop awn' na, yam muk kon' Hkrit hk'om pe' puri na', pe' lawn lah' leukah' un' duing mhawng' na' gawm'euc' ri ko', peue un' leuceng pun na', a'ko' peue un' yum' na' ti ri peue eun lawn lhon' ri ing' lec vang hk'om pe' puri na' ko', kaw eun un' lah' ma'rat pe' heul' hawc' aw? <sup>24</sup> Daecti pe' lawn buih sangsawn' leukah' mun' na' gawm'euc' ri ko', peue un' yum' na', a'ko' peue un' leuceng pun na' eun lawn lhon' ri ing' lec ko', ku' pun eun ri mhawng' na' a kaw yeuh eun pawn meuh eun peue map' na' mae' a kaw yeuh eun sum' leuploh' hk'a' a'yu im' ri na' yeut. <sup>25</sup> Ku' mo' ri hk'a'nae hpum' eun na' a kaw pucti lih glih'gleueng'. Hawc' ko', eun kaw seukluin ri fae' Peucawo' Eun. Eun kaw lah', “Peucawo' ut' Eun mae' pe' neumneum.”

*Hk'a' hk'om puri fae' hklel'hklawc'*

<sup>26</sup> Ec'awng' na' pe', e' ci' kaw lah' a yeuh sa'nhaw'? Yam hk'om pe' puri na' ngon' pe' lah' seng' cai, ngon' pe' sangsawn' leukah' mun', ngon' pe' tuh' ri tuil' leukah', ngon' pe' lah' leukah' un' duing mhawng', ngon' pe' ti vangdoh' ka leukah' un' duing mhawng' na' pucti lih. Punta kaw a yeuh muk kon' Hkrit na' ce huk'hawn' na', kah pe' yeuh ceu nang aen' ce ku ceu ka reu'. <sup>27</sup> A lawn kue' peue kaw lah' leukah' un' duing mhawng' na' ko', kah ce lah' yawo a la' peue, vang heun' ka loe' peue. Kah ce

\* 14:21 14:21 I'saya' 28:11, 12

lah' a ti peue hawc' ti peue. A kaw kah ri kue' nang ti vangdoh' ka na' lih ti ri peue. <sup>28</sup> Daecti a lawn un' kue' nang ti vangdoh' ka na' lih ko', kah peue awn' ce ut' dit' ti vang hk'om na' reu'. Kah ce lah' a ri ti meun mae' lah' a ri Peucawo' Eun.

<sup>29</sup> Pun ce peue sangsawn' leukah' mun' ren'kawn na' kah ce lah' a la' loe' peue. Kah peue seubu na' ce kuit ri mhawng' ku' lah' ce na' meulamlam ri. <sup>30</sup> Peue mok' mawn' na' ce ti ri peue eun lawn pun ri rap ri ti hk'a' Cit' seunga' na' tuh' ka eun nyu na' ko', kah ku' buih sangsawn' na' eun dit' ti reu'. <sup>31</sup> Kopti kaw pe' pan' pun puri lah' leukah' sangsawn' na' ti peue hawc' ti peue, aen' a meuh punta peue gawm'euc' na' kaw ce pun ri rap ri ti leukah' sangsawn' na' mae' hk'a' tuil' kaw' reng na'. <sup>32</sup> Cit' ce peue sangsawn' leukah' mun' ren'kawn na' kah a ri ut' hk'a' ruim ka hk'a' u' peung ce peue sangsawn' leukah' mun' ren'kawn na'. <sup>33</sup> Kopti Peucawo' hpaw Eun ca' meuh Cawo' ka ku' hpam' hpim' na'. Meuh Eun Cawo' ka hk'a' cumyen' na'.

Seun' ku' muk kon' Hkrit na' yeuh ce hk'a' naee vang hk'om ce puri na' ko', <sup>34</sup> beun' na' htuk' ce ri dit' ti hk'a' naee muk kon' Hkrit na'. Hpaw ce ca' pun ahkvang kaw leukah', daecti kaw ce kah ri onawn' rap ri ti a hot' seun' ku' lah' ka hk'a' naee leukah' ritroe na'. <sup>35</sup> Ce lawn sum' yawng ku' ti ri ceu ko', ce na' htuk' ri mhaing' me ri na' ce ti nya ri. Beun' leukah' hk'a' naee vang hk'om na' meuh a ku' hk'o' kaic.

<sup>36</sup> Leukah' Eun Peucawo' na' puc a ri neum pe' ri nanggal' aw? A'ko' rot a ri pe' palkoe aw? <sup>37</sup> A'nhaw' lawn sawn' meun ri meuh peue suip leukah' Eun Peucawo' na', a'ko' sawn' meun ri ut' hk'a' ka Cit' seunga' na' ko', eun na' htuk' ri yawm' ri rap ri ti leukah' tem' ui' ri pe' aen' meuh a leukah' tuil' Eun Peucawo'. <sup>38</sup> Daecti a'nhaw' lawn tecla a ko', eun kaw pun ri hkam' hk'a' tecla na' yeut.

<sup>39</sup> Kop awn' na ec'awng' uí' na' pé', yeuh ri hpum' huk' ri sangsawn' leukah' mun' ren'kawn na' reu'. Pawlae ham'tap hk'a' lah' leukah' un' duing mhawng' na'. <sup>40</sup> Daecti htuk' ri yeuh ku ceu na' hot' ku' kuing' a ri meuh na' hot' glak' hot' htan ka na' reu'.

## 15

### *Yesu' Hkrit tang kuh' im' Eun*

<sup>1</sup> Ec'awng' na' pé', sum' tuil' uí' sati pé' ri kuit rot ri leukah' mun' ren'kawn sangsawn' uí' a ri pé' ku' pun pé' ri rap ri ti a hawc' pé' yum' keutawn' hk'a'nae ka na'. <sup>2</sup> Pé' lawn jhawp' leukah' mun' ren'kawn aen' a keutawn' seupit ko', pé' kaw lawtpon ri leukah' mun' ren'kawn aen' a. A lawn un' yeuh keutit' ko', hk'a' yum' pé' na' meuh a ku' hk'o' hk'awng'.

<sup>3</sup> Kopti lawng ku' pun uí' ri rap ri ti uí' sangsawn' pé' ri ka aen' meuh a ku' a'ye' keuting hk'ai' peue. A meuh lawng Hkrit pun Eun ri yeum kopti meuh a map' e' na' hot' seun' ku' tem' a ri hk'a'nae htawm Seungá' na'. <sup>4</sup> Eun pun ri hkam' hk'a' puing' ri na'. Hawc' ka loe' seunyi na', Eun pun ri tang kuh' im' hot' seun' ku' tem' a ri hk'a'nae htawm Seungá' na'. <sup>5</sup> Hawc' tuil' Eun Petru'\* eun nyu tu' ri na', Eun ku tuil' peue cae ri kul'leual' peue na' ce nyu ri yeut. <sup>6</sup> Hawc' awn' na, Eun tang tuil' ec'awng' hpawn' pak' peue pai' na' ce nyu ri na' tiduih'. Peue awn' ce saec' yeum heul' ngon', daecti maet' maen' ce kawn' a'yu im' hk'a' heun'. <sup>7</sup> Hawc' awn' na, Eun tuil' Yakop' eun nyu ri. Hawc' ko', Eun tuil' peue cae ri na' ce nyu ri gawm'euc'. <sup>8</sup> Vang tisut' ka na', uí' saec' na' seun' o'ngak un' nang hk'o' keut' uí' keut' na' ko', Eun ku tuil' uí' nyu ri yeut.

---

\* **15:5** 15:5 Leukah' Helasa' ka na' a lah' Kefas'. Kefas' na' a meuh muis seubu eun Petru' na'.

<sup>9</sup> Kopti hk'a'naee muk ce peue caee Eun Yesu' na' meuh ui' peue aet' hk'ai' peue. Kopti tawn keunhap' ui' muk kon' Hkrit Eun Peucawo' na' ce, ui' hkuin' kuing' ri meuh peue caee Eun Yesu'. <sup>10</sup> Daecti kopti meuh a mun' Eun Peucawo' na', ui' ku lak' meuh yeuhki'. Mun' Eun Peucawo' kue' ri ui' na' a hkuin' meuh ku' hk'o'hk'awng'. Ui' yeuh kan' heun' hk'ai' peue caee Eun Yesu' na' ce gawm'euc'. Daecti ui' hkuin' yeuh meun a, mun' Eun Peucawo' ku' kue' hk'a'naee ui' na' a yeuh a. <sup>11</sup> Kop awn' na, ui' ri un' lah' ce ri un' lah', ye sangsawn' yawo lawng ku' ti ceu awn' na, pe' ku pun ri yum' lawng awn' na hawc'.

*Hk'a' tang kuh' im' hk'ai' vang yeum*

<sup>12</sup> Ye lawn sangsawn' lah' Hkrit pun Eun ri rap ri ti hk'a' tang kuh' im' Eun hk'ai' vang yeum ri na' hawc' ko', a ci' yeuh keunhaw' ngon' pe' vae' kawn' meung lah' ri hk'a' tang kuh' im' na' un' kue'? <sup>13</sup> A lawn un' kue' hk'a' tang kuh' im' hk'ai' vang yeum na' ko', Hkrit Eun ku hkuin' kaw pun ri tang kuh' im'. <sup>14</sup> Hkrit Eun lawn un' pun ri tang kuh' im' ko', leukah' mun' sangsawn' e' na' a hkuin' kaw kue' mun'. Hk'a' yum' e' na' a ku hkuin' kaw kue' mun' yeut. <sup>15</sup> Lheu' awn' na, meuh a kopti hkam' e' sa'hki' ka lawng Peucawo' yeuh Eun Hkrit Eun tang kuh' im' na', e' ku na' meuh nang hkam' sa'hki' chi'lai lawng Eun Peucawo' na'. Daecti peue yeum na' ce lawn un' pun ri tang kuh' im' ko', Peucawo' Eun ku hkuin' kaw yeuh Hkrit Eun tang kuh' im'. <sup>16</sup> Kopti Peucawo' Eun lawn un' yeuh peue yeum na' ce tang kuh' im' ko', Eun ku na' un' yeuh Hkrit Eun tang kuh' im' yeut. <sup>17</sup> Hkrit Eun lawn na' un' pun ri tang kuh' im' ko', hk'a' yum' pe' na' a hkuin' kaw kue' mun'. Pe' ku na' kawn' ut' hk'a'naee map' ri na' meun. <sup>18</sup> Lheu' awn' na, peue pun ri yeum hk'a'naee Hkrit Eun na' ce ku na' lulaic heul' yeut. <sup>19</sup> E' lawn kue' vang keutui' hpum' hk'a'naee Hkrit Eun yam



kawn' a'yu im' e' maet'maen' na' palkoe yawo ko', e' kaw meuh peue kue' vang tuckyak peue hk'ai' peue gawm'euc'.

<sup>20</sup> Daecti neumneum ka na' ko', Hkrit pun Eun ri tang kuh' im' hk'ai' vang yeum ri na' hawc'. Eun meuh pli' nanggal' hk'a'nae peue pun ri yeum heul' hawc' na' ce gawm'euc'. <sup>21</sup> Kopti seun' hk'a' yeum na' keut' kue' a kopti meuh a peue ti peue na' eun na', hk'a' tang kuh' im' hk'ai' vang yeum na' a ku keut' kue' kopti meuh a peue ti peue na' Eun yeut. <sup>22</sup> Kopti seun' peue gawm'euc' na' pun e' ri yeum kopti meuh a Adam eun na', peue gawm'euc' na' e' kaw pun civit na' kopti meuh a Hkrit Eun. <sup>23</sup> Daecti e' kaw sawng' kah ri ko' yam ri na' ti peue hawc' ti peue. Hkrit Eun meuh nang kuh' im' nanggal'. Hawc' ka na' yam na' Eun tang lih na', peue Eun na' ce kaw tang kuh' im'. <sup>24</sup> Hawc' awn' na yam hawc' Eun yeuh ri cawo' u'peung, cawo' an'nya keuting mae' cawo' ti'ca keuting na' ce lulaic gawm'euc' na', Eun kaw ap kuing' na' ri A'kuiing' Eun, yam awn' na a kaw rot yam tisut' na'. <sup>25</sup> Kopti Hkrit kaw Eun kah ri u'peung kuing' na' rot ti yam yeuh Eun ransu ri na' ce ut' hk'a'ruim ka dak cung ri na' gawm'euc' na'. <sup>26</sup> Ransu tisut' ku' Hkrit kaw Eun sawm ri yeuh a lulaic na' a meuh hk'a' yeum na'. <sup>27</sup> Kopti hk'a'nae htawm Seunga' na' lah', "Peucawo' yeuh Eun ku ceu na' ce ut' hk'a'ruim ka dak cung Eun na'."† Yam lah' Eun, "Ku ceu na'" ut' ce hk'a'ruim ka dak cung Eun na', a hkuin' pa' Peucawo' Eun na' e' yawng a glih'gleueng' kopti meuh Eun Cawo' yeuh ku ceu na' ce ut' hk'a'ruim ka dak cung Eun Hkrit na'. <sup>28</sup> Yam Peucawo' hawc' Eun yeuh ri ceu nang aen' ce na', Kon' ai' Eun ku ut' hk'a'ruim ka hk'a' u'peung Eun Peucawo' Cawo' yeuh ku ceu na' ce ut' hk'a'ruim ri na' Eun. Aen' a meuh punta Peucawo' kaw Eun ut' hk'a' pang ku ceu gawm'euc' na'.

---

† 15:27 15:27 Suk'seun' 8:6

<sup>29</sup> Yeuh keutit' ko', a lawn un' kue' hk'a' tang kuh' im' hk'ai' vang yeum na' ko', peue rap ri ti hk'a' cum' pun peue yeum na' ce ci' kaw yeuh sa'nhaw'? Peue yeum na' ce lawn un' tang kuh' im' ko', a ci' meuh kop keunhaw' a vae' kaw' kue' peue rap ri ti hk'a' cum' pun peue yeum na' ce? <sup>30</sup> A ci' meuh kop keunhaw', e' vae' kah ri hkam' ku' hk'o'lhath' na' laleung? <sup>31</sup> Ec'awng' na' pe', pun ui' ri yeum ku seunyi. Mhawng' ui' ri hk'o'cuin ri pe' ri ku' Yesu' Hkrit Cawo' e' na' yeuh Eun ri pe' na'. <sup>32</sup> Ui' saec' na' klaee' sat' hk'i nang veng E'fe'su' na', daecti Peucawo' Eun lawn un' yeuh peue yeum na' ce tang kuh' im' ko', a ci' kaw kue' mun' keunhaw' pun ui'?

“E' hk'asom' pawh,

kopti peunsa' kaw e' yeum.”<sup>‡</sup>

<sup>33</sup> Pawlaee kah peue yeuh pe' kleuc' hk'a' ri. Yeuh a'mawo mae' peue un' chak' na' ko', yeuh a ritroe chak' na' lu.

<sup>34</sup> Kuit ri nawk hk'a' leupaws seumeu' na' reu'. Pawlaee tang yeuh map' na' bae. Kopti peue ngon' na' un' yawng ce lawng Eun Peucawo' na'. Lah' ui' a yeuhki' na' meuh a punta kaw a yeuh pe' kaic.

### *Jawngkuí tang kuh' im'*

<sup>35</sup> Daecti peue ti ri peue na' eun cang mhaing', “Peue yeum na' eun ci' kaw tang cang kuh' im' yeuh sa'nhaw'? Yam tang kuh' im' eun na', jawngkuí tu' eun na' a ci' kaw yeuh sa'nhaw'?” <sup>36</sup> Peue suisa na' mi, ku' seumal puin' mi na' a lawn un' nang yeum ko', a hkuin' kaw cang kaws puc ri. <sup>37</sup> Yam puin' mi na', seumal sa'li, a'ko' seumal ku' seubu na', hpaw mi ca' puin' kleum' ka, puin' mi pal seumal ka. <sup>38</sup> Daecti Peucawo' Eun tuil' kleum' ka na' hot' seun' ku' tang' Eun ri uin' na'. Eun tuil' ruprang kleum' ka na' hot' seun' ceu ka ku' seumal na'. <sup>39</sup> Keune gawm'euc'

<sup>‡</sup> 15:32 15:32 I'saya' 22:13

na' a hkuin' seun' puri. Keune peue na' a meuh ri is' ti ceu, keune sat' na' a meuh ri is' ti ceu, keune sim' na' a meuh ri is' ti ceu, keune ka' na' a meuh ri is' ti ceu.  
<sup>40</sup> Saec' meuh jawngkui' tu' na' a ku kue' jawngkui' tu' hk'a' kuing' pang mao' mae' jawngkui' tu' hk'a' bhen' keute' na' yeut. Daecti munhpung' ka jawngkui' tu' hk'a' kuing' pang mao' na' a meuh ri is' ti ceu. Munhpung' ka jawngkui' tu' hk'a' bhen' keute' na' a meuh ri is' ti ceu. <sup>41</sup> Munhpung' ka seunyi na' a meuh ri is' ti ceu. Munhpung' ka a'chi' na' meuh ri is' ti ceu. Munhpung' ka seumeueng' na' a meuh ri is' ti ceu. Neumneum ka na' ko', munhpung' ka seumeueng' na' ti meul' hawc' ti meul' a ku sawng' chat puri.

<sup>42</sup> Hk'a' tang kuh' im' ce peue na' a ku seun' awn' a yeut. Jawngkui' tu' puin' ri na' a kaw seueum' lhu'jah heul', daecti civit tang kuh' im' na' a kaw im' cot'cu ri. <sup>43</sup> Ku' puin' ri na' a hkuin' kue' munhpung', daecti ku' tang kuh' im' na' a kue' munhpung' na' htonnuk. Ku' puin' ri na' a kaw' reng kloe, daecti ku' tang kuh' im' na' a kaw' reng keuting. <sup>44</sup> Ku' puin' ri na' a meuh jawngkui' tu', daecti ku' tang kuh' im' na' a meuh cit'.

A lawn kue' jawngkui' tu' ko', a ku kue' jawngkui' cit' yeut. <sup>45</sup> Kop awn' na, kue' a ku' tem' ri yeuhki', "Adam la ri meuh peue nanggal' na' a'yu im' eun."§ Adam ing' hot' na' meuh Eun cit', Eun meuh Cawo' tuil' hk'a' a'yu im'. <sup>46</sup> Jawngkui' cit' na' hpaw a ca' ing' nanggal'. Jawngkui' tu' na' ing' a nanggal'. Jawngkui' cit' na' a kaw'n' ing' hot'. <sup>47</sup> Peue nanggal' na' ing' eun neum keute' ka bhen' keute' na', daecti peue ing' hot' na' Eun lih neum kuing' pang mao'. <sup>48</sup> Peue ka keute' na' eun lawn yeuh sa'nhaw' ko', peue bhen' keute' na' ce ku yeuhko' yeut. Peue ka kuing' pang mao' na' Eun lawn yeuh sa'nhaw' ko', peue kuing'

---

§ 15:45 15:45 Yamla 2:7

pang maó' ná' ce ku yeuhko' yeut. <sup>49</sup> Seun' keut' é' ri pucti lih é' seun' ruprang eun peue bhen' keute' ná' eun ko', é' ku kaw kue' ruprang Eun peue kuing' pang maó' ná' Eun yeut.

<sup>50</sup> Ec'awng' ná' pe', kaw uí' lah' a ri pe' yeuhki', nham' keune ná' a hkuin' kaw cang rap ri ti sin' ka kuing' Eun Peucawó' ná'. Ku' cang seueum' heul' ná' a hkuin' kaw cang rap ri ti sin' ka ku' un' cang seueum' heul' ná'. <sup>51</sup> Leuceng a reu', kaw uí' lah' leukah' vangdoh' rui' ná' ri pe'. Hpaw é' ca' kaw pun ri yeum gawm'euc', daecti kaw é' pun ri leuploh' plin' ri <sup>52</sup> hk'a'naee ti jep ngai' ná' yam pi'tae'rae' ná' sawm a ri puing' ri ná'. Kopti seng' ka pi'tae'rae' ná' kaw a laws', peue yeum ná' ce kaw pun ri tang kuh' im' hk'a'naee kaw ce un' laee cang seueum' heul' ná'. E' ku kaw pun ri leuploh' plin' ri yeut. <sup>53</sup> Kopti ku' cang seueum' heul' ná' a kaw pun ri cuip' hk'eung ku' un' cang seueum' heul' ná'. Ku' cang yeum ná' a kaw pun ri cuip' hk'eung ku' un' cang yeum ná'. <sup>54</sup> Yam ku' cang seueum' heul' ná' cuip' hk'eung a ku' un' cang seueum' heul' ná' maeé' yam ku' cang yeum ná' cuip' hk'eung ka ku' un' cang yeum ná', leukah' tem' ri uin' ri ná' kaw a meuh neumneum. Aen' a meuh, "hk'a' pe ná' gleun a hk'a' yeum ná'."\*

<sup>55</sup> "O', hk'a' yeum, hk'a' pe mi ná' a cí' ut' tawngnhaw'?

O', hk'a' yeum, pit mi ná' a cí' ut' tawngnhaw'?"†

<sup>56</sup> Pit ka hk'a' yeum ná' meuh a map' ná'. Ti'ca ka map' ná' meuh a leukah' ritroe ná'. <sup>57</sup> Daecti mun' keuting ri Peucawó' Eun. Tuil' Mi hk'a' pe ná' ri ye ri Yesú' Hkrit Cawó' ye ná' Eun.

<sup>58</sup> Kop awn' na ec'awng' leumeus' uí' ná' pe', cawng keutawn', pawlaee va ri keuyuih' fuii'fai'. Saec' yamnhaw',

\* 15:54 15:54 I'saya' 25:8 † 15:55 15:55 Haw'se 13:14

sae'caee' yeuh kan' Eun Peucawo' na' htonnuk reu'. Kopti tup yawng pe' kan' ku' yeuh pe' hk'a'naee Heun na' kaw a un' meuh ku' hk'o'hk'awng' na'.

## 16

### *Hk'on'ro paec tan pun peue Eun Peucawo' na' ce*

<sup>1</sup> Lawng hk'on'ro paec tan pun peue Eun Peucawo' na' ce na', kah pe' yeuh a seun' ku' lah' ui' ri muk kon' Hkrit ut' nang kuing' Galati' na' ce reu'. <sup>2</sup> Yam na' ui' ing' rot na' punta kaw pe' un' laee pun ri gal' ri hk'on'ro paec tan na', seunyi Sin' na' ku sin', kah pe' bai hk'on'ro ri rok'sa' paec tan kuing'hpaw mae' mun' ku' sawng'sawng' pun pe' na' tiduih' reu'. <sup>3</sup> Yam ing' rot ui' na', ui' na' tem' lai kaw meuh sa' hki' ka tuil' a ri peue ku' nyu pe' htuk' hpum' ri pe' leuk ce meuh nang kaw huk' tuil' lai na' mae' paec tan pe' na' nang veng Yeru'salaem na'. <sup>4</sup> Ui' lawn kaw kah ri huk' ko', ui' ku' na' huk' mae' ce yeut.

### *Leukah' hk'o'hk'ang eun Paw'lu*

<sup>5</sup> Kopti kaw ui' kah ri hpa' kuing' Masido'ni' na', yam hawc' hpa' ui' kuing' Masido'ni' na', ui' kaw tang ing' rot ri pe'. <sup>6</sup> Ui' saec' na' heul' hk'a'nhaw' un' lah' punta kaw pe' teum'kawm hk'a' suip ui' ri kaw heul' na', na' ui' chak' cang ut' mae' pe' ti cu hkao' rot ti yam kawt' na' pon ka na'. <sup>7</sup> Maet'maen', ui' kaw hpa' heul' ui' na' nyu pe' ti vut ti yam yawo na' ui' hkuin' sum' kah a yeuh keuti'. Daecti a lawn cawp' alo Eun Peucawo' ko', kuit ui' ri na' ut' mae' pe' ti cu hkao'. <sup>8</sup> Daecti ui' kaw suip ri ut' nang veng E'fe'su na' rot ti yam pawe Peteko'te na' rot ka na'. <sup>9</sup> Kopti punta kan' ku' yeuh ui' maen' na' kaw a kue' pli' heun' na', leuva' ka na' tah' a ri vah hawc'. Daecti peue ham'tap ui' na' ce ku kue' heun'.

<sup>10</sup> Tí'mó'se eun lawn ing' ri pé' kó' kopti eun ku yeuh kan' Eun Peucawó' ná' seun' uí' ri ná', uí' kaw hk'o' pé' ná' rap ri ti eun un' va eun kue' ku' hki'keung yam ut' eun maeé' pé' ná'. <sup>11</sup> Kop awn' na, a'nhaw' pawlaee va ri un' sum' rap ri ti eun. Daecti punta kaw eun tang ing' ri uí' ná', teum'kawm eun cang suip hk'a' ri ná' heul' hk'a'naee hk'a' kuit nyawk' kuit sam'ran cumyen' ná' reu'. Buih kó' uí' eun maeé' ec'awng' ná' ce.

<sup>12</sup> Ec'awng' uí' Apaw'lu eun kó', uí' saec' ná' có'ca' ri kaw kah eun heul' ri pé' maeé' ec'awng' ná' ce tiduih' kó', daecti maet'maen' eun hkuin' nang sum' heul'. Eun lawn kue' yam kaw heul' kó', eun ná' heul' ri pé' yeut.

<sup>13</sup> Kah pé' ná' yeuh ri pawn kui' ri, keutawn' hk'a'naee hk'a' yum' ri ná', yeuh hpum' ri hat'han' maeé' kaw'ring keuting ri reu'. <sup>14</sup> Ku' yeuh pé' gawm'euc' ná' yeuh a hk'a'naee hk'a' leumeus'keus ná' reu'.

<sup>15</sup> Lawng peue nya peue hk'ul' eun Satehpanas' ná' meuh ce kon' Hkrit nang kuing' Ahkaiya' ná' nanggal' peue ná' maeé' lawng tan ce tú' ri ná' ce yeuh mhai' ce peue Eun Peucawó' ná', pé' ku yawng a yeut. Ec'awng' ná' pé', kaw uí' hk'o' pé' <sup>16</sup> yawm' ri leuceng ri ti leukah' ce peue awn' ce maeé' leukah' ce peue yeuh kan' maeé' ce ná' ce reu'.

<sup>17</sup> Yam Satehpanas', Fawtunatas' maeé' Ahkaias' ing' rot ce ná', uí' ren'kawn nyawk' kopti ku' un' yeuh pun pé' ri uí' ná', yeuh pun ce a ná'. <sup>18</sup> Ce yeuh hpum' uí' ná' maeé' hpum' pé' ná' ren'kawn. Hkopyawm' ri ri peue yeuhki' ná' ce reu'.

### *Leukah' tisut'*

<sup>19</sup> Muk kon' Hkrit ut' hk'a'naee kuing' Asa' ná' ce ku tawm' a ce lah' ri leunyeng ri pé'. Ahkio'la' eun maeé' Pli'si'la' eun maeé' muk kon' Hkrit ku' hk'om puri nang nya ka Ahkio'la' maeé' Pli'si'la' ná' ce ku tawm' a ce lah' ri leunyeng ri pé' hk'a'naee Peucawó' Eun. <sup>20</sup> Ec'awng'

gawm'euc' na' ce ku tawm' a ce lah' ri leunyeng ri pe'. Yam hk'eup' puri na', gloh' ti' puri hk'a'naee vang seungá chak' na' reu'.

<sup>21</sup> Leukah' tisut' aen' na, ui' ri, meuh ui' Paw'lu. Ui' tem' a ri ti' ri na' meun.

<sup>22</sup> A'nhaw' lawn un' leumeus' Peucawo' Eun ko', kah eun pun ri hkam' hk'a' jha' na' reu'. Peucawo', lih reu'.

<sup>23</sup> Kah mun' sin' Eun Cawo' Yesu' na' kue' ri pe' reu'.

<sup>24</sup> Kah hk'a' leumeus' keus ui' na' kue' ri pe' gawm'euc' hk'a'naee Yesu' Hkrit Eun reu'.

**Plang**  
**The New Testament in the Blang language of Myanmar**

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

---

PDF generated using Haiola and XeLaTeX on 10 Sep 2021 from source files dated 10 Sep 2021

0468b0b5-acb2-59c4-92d3-4fa09a4d091c